



Dr. H. Hagen.  
Koenigberg.  
1850.

C. A. Dohrn.



K.5255

<http://rcin.org.pl>

58



ICONES  
INSECTORVM

PRAESENTIM

ROSSIAE SIBIRIAEQUE  
PECULIARIVM

QVAE

COLLEGIT ET DESCRIPTIONIBVS

ILLVSTRAVIT

PETRVS SIMON PALLAS

M. D.

ACADEMICVS PETROPOLITANVS.



---

ERLANGAE  
SUMTV WOLFGANGI WALTHERI,  
clo 1o cclxxxli.



*Saltem remoto, des pater, angulo  
Horas senectae duvere liberas;  
Tutumque vulgari tumultu  
Eripias, hominumque curis.*

GRAY.

ILLVSTRI ATQVE CELEBERRIMO

V I R O

NATVRAE INDAGATORI FELICISSIMO

I G N A T I O A B O R N

S. R. I. NOBILI ET EQVITI

DOMINO IN ALTZEDLITSCH, LVKAVEZ ETC.

S. CAES. R. MAIESTATIS IN REBVIS METALLARIIS ET MONETARIIS  
CONSILIARIO, ACAD. IMPER. PETROPOL. REG. HOLMIENS.

ALIORVMQVE SOCIO

PRIMITIAS ENTOMOLOGIAE

ROSSO - ASIATICAE

IN DEDITISSIMI ANIMI MONIMENTVM

D. D.

PETRVS SIMON PALLAS.

ФОНДЫ

ИЯЛА ГОТЛАНД

ЗАВИСИЛИ ОДНОМУ

ЗАКЛЕНЫ МОИ СИЛЫ



## PRAEMONENDA.

---

**I**llustris quondam LINNAEVS nihil magis in votis  
babuit, quam ut Insecta Sibiriae innotescerent.  
Et utique nullius, in Orbe arctico nostro, regionis minus,  
quam hujus Entoma innotuerunt. Hoc ipsum excitabat me,  
ut, durante itinere per Imperium Russicum ab Ao. 1768.  
ad 1774. continuato, assiduam in colligendis iis operam  
navarem. Neque carui successu, quum plurimas ex omni  
genere novorum Insectorum Centurias passim collegerim,  
ut e Fauna Imperii Ruthenici, propediem typis tra-  
denda, satis elucebit. —

Plura quidem ex his notatu digniora in Appendi-  
cibus ad Itinerarii germanico sermone editi Volumina  
descripsi; sed gratius Curiosis me facturum putavi, si

PRAEMONENDA.

*selectiorum specierum, quae vel singularitate formae se commendant, vel ob similitudines aegrius distinguuntur, etiam Icones, praesertim vivis coloribus illustratas ederem. Id vero Chalcographorum in urbe, ubi tantisper vivo, subtiliori operi aptorum defectu forte diu differendum fuisset, nisi sua solita in me benevolentia chalcographicae rei curam in se suscepisset Ill. & Celeberrimus SCHREBER, licet tot aliis laboribus, & illustri praesertim Zoologiae Codice, distentus. Qua Ejus amica opera effectum est, ut Tabulae jam ante triennium & quod excurrit, a pictore paratae, Insectis praesertim Sibiricis commendabiles, nitidissime & accuratissime in aere expressae nunc divulgari queant, tanquam novum Celeberr. SCHREBERI erga me amicitiae, & in publicum Studii nostri incrementum non satis celebrandi affectus testimonium.*

*Prodeunt igitur, sub auspiciis exoptatissimis, Insectorum Rossiae & Sibiriae praesertim peculiarium Icones primae, quas exquisitiore arte & coloribus suis expressas vedit orbis. Quandoquidem vero pleraque horum, ut in frigidioribus locis Naturae lege sancitum est, non bene magna statura gloriantur: ad ornandas tabulas aliqua passim Indiae utriusque Insecta inferui, quorum figurae nullae bonae extabant; immo ut genera quaedam, hacte-*

PRAEMONENDA.

*nus negligenter tradita, v. gr. Buprestidum, Tenebri-*  
*num, Meloidum, illustrarem, omnes fere, quas collige-*  
*re potui, species eorundem, nisi quae notissimae videban-*  
*tur, adjeci. Eo, & quod mora aliquot annorum in*  
*edendis hinc Tabulis facta est, quaedam interim, sed*  
*paucae admodum species mihi delineatae, in aliis recen-*  
*tissimis opusculis passim depictae prodierunt; unde repe-*  
*tionis vitium, quod alias cane pejus & angue odi, ne-*  
*cessario committendum fuit invito. Attamen vix in tri-*  
*gesimum quodque, delineandorum hinc tabulis Insecto-*  
*rum, ista culpa cadet, si illa exceperis, quae a pessimis*  
*chalcographis prodiere, & quasi pro nondum delineatis*  
*habenda sunt.*

*Vt curiosis emptio esset facilior, placuit non ma-*  
*gnis Fasciculis has edere Tabulos, tres circiter in singu-*  
*lo, quantoque fieri potuit numero Figurarum confertim*  
*obsitas. Dum vero sic particulatim prodeunt, vereor*  
*ne Editores Promptuariorum & Compilatores, quibus,*  
*praesertim in Germania nostra, misere bodie abunda-*  
*mus, meliora hinc decerpant, suisque inserant Cento-*  
*nibus, ut emantur ipsi & superfluum emtoribus reddant*  
*fontem e quo hauserant. Fecerunt hoc in multis, fece-*  
*runt in Spicilegiis Zoologicis quorum discepta lace-*  
*raque fragmenta illico in nescio quot libros transferunt;*  
INSE

PRAEMONENDA.

eoque mirum quantum iis, qui nova inventa in Scientia Naturali publicare volunt, nocent & obstant, deterrendo Bibliopolas, qui ejusmodi operum & tabularum expensas primas necessario detrectant, quum non sibi sed aliis lucrum inde esse vident. Hos itaque male officiosos laudatores rogaverim, ut ab hisce saltem Tabulis manus abstineant, ne nos cogant ita lente procedere, ut in Spicilegiis coactus facio, imo forte coepito abstinere adigant. Dab. Petropoli Augusto mense Anni MDCCLXXIX.



INSE-



# INSECTORVM DESCRIPTIONES.

---

A I. *LVCANVS?* APTERVS;

*Tab. A. Fig. 1: a. b. c.*



ubhemisphaericus, ater, opacus; thorace convexo,  
marginato, elytra brevissima coalita subaequante.

? *Scarabaeus radicis* Helenii *VALISNER.* *oper. I.* p. 79. *tab. 6. fig. 1. 2.*

*Scarabaeus cephalotes* *PALL.* *itin. I. append.* p. 461. n. 23. *GÖTZE entom. I.*  
*p. 116.*

*Lucanus apterus* *LAXMAN.* *Nov. Com. Petrop. Tom. XIV.* p. 594. *tab. 24. fig. 1.*

*Lethrus scopol.* *introd. in hist. nat.* p. 439.

Occurrit in australis Russiae, Tatariaeque desertis aridis, passim  
sub fimo sicco & circa radices plantarum perennium & suffrutescentium;  
mihi omnium primo circa Lacum salsum Inderensem lectus, dein ad  
Volgam versus Astrachaniam. Insectum, verosimillime a *Valisnero* indi-  
catum, anomalum, inter Lucanos & Scarabaeos Coprideos ambiguum,  
simil affine Tenebrionibus apteris.

A

## DESCRIPTIO.

Specimina a me ipso lecta, iconum magnitudinem (*fig. I. a. b. c.*) referebant; sed duplo majora e Russia australiore communicavit *cel. LAXMAN*, paremque ex Austria misit *Ill. Eques à BORN*.

*Caput* magnum, praesertim masculis, antice submarginatum, lamella utrinque ante oculos horizontali auriculatum. *Oculi* parvi, prominuli, expansione ejusdem lamellae transversim bifecti.

*Forcipes* exsertae, magnae (foeminis capite minores) triquetrae, hiulcae, obtusae; *maribus* subtus ramo furcatae, qui in majoribus utrinque aequales & in medio fere forcipum oblique deorsum exserti, ipsaque forcipe majores sunt; at in minoribus meis exemplis saepius dextra maxilla tantum apice subbifida, sinistra usque ad basin diffissa. *Foeminis* forcipes lunatae, interiore acie denticulatae. In utroque sexu *labium* bilobum supra os; *palpi* inter forcipes trium parium, biarticulati, pilosi.

*Antennae* subinfractae, pedunculo brevi, cylindrico, apice pilis ciliato, clava solida oblique truncata, umbilicata, intermediis articulis se- ptenis aequalibus.

*Thorax* convexus, abdomine latior, marginatus, antice profunde exflectus, angulo utrinque prolixo rotundato; postice isthmo, qui scutelli locum tenet, ab elytris subremotus.

*Abdomen*, ut in coprideis, brevissimum inter posticos pedes & elytrorum marginem vix conspicuum.

*Elytra* connata, hemisphaerico - convexa, lateribus carinata (*fig. I. a.*) & abdomen subtus inclientia. *Alae* nullae.

*Pedes* magni, pilosi, postici ano proximi: antici majores rebustiores, in gibbo pectoris positi, tibiis apice dilatatis exteriusque dentatis; reliqui tibiis triquetris, pilosis. *Tarsi* omnium pilosi, quadriarticulati; *phalanx* longiuscula.

*Corpus* totum durissimum, atrum, parum nitidum, glabrum.

Figurae in *Tab. A.* exhibitae utrumque sexum minoris varietatis referunt, *I. a.* marem a latere inspectum, ut maxilla dextra usque ad basin fissa appareat; *I. b.* foeminam & *I. c.* item marem, a dorso inspectos.

## A 2. SCARABAEVS MOERIS;

Tab. A. Fig. 2.

*Coprideus ater*, galea subrotunda, integra, centro subcornuta, femoribus ovatis, foveolis thoracis scutellaribus, puncto utrinque impresso.

Species nullibi, quod sciam descripta, vel delineata; neque uspiam, praeter Lacum falsum Inderensem deserti tatarici, ultra Iaicum fl. lecta.

## DESCRIPTIO.

*Magnitudo* infra Sc. lunarem; forma depresso Sc. sacro similior. *Totus ater*, nitidulus.

*Galea* capitis subrotunda, declivis, futura inter oculos transversali angulata, prominentia verticis conica, cristulaque ante futuram in medio disco obsoletissima.

*Clypeus* convexus, antico margine gibbus, punctatus, marginatus, utrinque puncto impresso, foveolaque gemina obsoletiore ad futuram elytrorum (quod in pluribus etiam exoticis).

*Elytra* a dorso planiuscula, exterius angulata atque marginata, basi subrugosa longitudinaliter, obsoletissimeque striata.

*Subtus* caput, pectus, pedesque pilosissima. *Femora* depressa, ovata; *tibiae* primores quadridentatae, robustissimae, posteriores prismaticae, extus dente unico, terminalibus duobus; spina media gemina, postice solitaria terminatae.

Icon Tab. A. fig. 2. naturalem magnitudinem a dorso inspecti exhibet.

## A 3. SCARABAEVS MOPSVS;

Tab. A. Fig. 3.

*Coprideus*, ater opacus, glaberrimus, galea inermi, subemarginata laevigata, tibiis posticis arcuatis, thorace utrinque foveola obsoleta.

A 2

### A 3. SCARABAEVS MOPSVS.

In Dauria campestris & circa Selengam fl. sub equino stercore copiosissimus Iunio; aliquoties & in deserto Cumano, inter Tanain & Volgam lectus fuit, sed intermedias per regiones nusquam apparuit, & inter descriptas hucusque species nulli convenire videtur. Licet enim species apud Cl. Voet tab. 26. f. 28. nomine Nigritae francofurtani delineata, magnitudine & forma accedit, tamen pedibus longioribus, robustioribus, magisque dentatis, aliisque differt nosfer, neque cum affini Copride mutica secunda SCHAEFER. ins. ratisbon. tab. 3. fig. 7. confundendus est.

#### DESCRIPTIO.

Praecedente minor, et multa specimina vix allegatam SCHAEFERI iconem superant. Totus ater, supra opacus, subtus nitidus.

*Galea* inermis, anterius semicircularis obsolete emarginata, postice circumscriptio subelliptica, futuris duabus obliquis, a nucha divergentibus, obsoletissimis.

*Clypeus* laevissimus, aequaliter convexus, utrinque foveola impressus, elytris latior.

*Elytra* dorso planiuscula, laevissima, pone axillas finu excisa, angustata, supra anum transverse gibba.

*Pedes* longiusculi, intermedii minores; *femora* oblonga, nitida, glabra; *tibiae* anticae triquetrae, scabiae, extremo tridentato - palmatae; posticae elongatae, arcuatae, triquetrae, angulis ferrulatis, interiore duplicato. Femora & caput subtus subpubescunt.

Icon Tab. A. fig. 3. specimen e majoribus exprimit.

### A 4. SCARABAEVS MENALCAS;

Tab. A. Fig. 4. a. b.

Coprideus, sericeus viridi - coeruleus, elytris gryseis, viridi - nervosis, galea rhombea subcornuta, pedibus anticis adastylis.

Scarabaeus humerofus PALL. itin. I. app. p. 462. n. 25. GOETZE et tom. I. p. 70.

Species inter coprideas elegantissima, satis frequens in deserto aridissimo ad septentrionem maris Caspii, circa Volgam & Iaikum inferiores, ubi sub recenti praesertim vaccino stercore delitescit, solitarius. Coerulam varietatem tantum circa lacum falsum Inderensem inveni. Sed pedum proportione sexum distingui credo. Infectum asperatum oleo corrosivo acum & chartam substratam erodit; sed carent isto ichore exempla, quae muria lacus macerata collegi.

## DESCRIPTIO.

*Magnitudo* paulo infra Sc. Moerin. *Galea* nisi magis rhomboidea, futura corniculoque verticis, ut in eodem. *Labium* superius bilamellatum.

*Clypeus* convexus, utrinque gibbo-dilatatus, puncto versus laterales margines impresso; postico margine subrepandus, impressione gemina lunata in regione scutelli.

*Elytra* integra, gryeo-lutescentia, futura, margine, nervisque in singulo binis atro-coerulecentibus. Reliquum corpus totum e viridi vel coerulecente (rarius violaceo) sericeum, nitidissimum.

*Pedes* in pluribus, proportione & forma, ut in Scar. Moeri; femora postica anterius dente subtus spiniformi. — In paucioribus, corpore magis oblongis, forte sexu diversis, pedes omnes longiores, & praesertim antici elongati; iidemque in utroque sexu tibiis arcuatis, dentatis, spina terminatis; sed destituti tarso & unguibus.

Caput subtus, pectus, femoraque antica *pilis* lanuginosa, tibiae interno margine subciliatae; reliqui pedes subpilosii.

Varietatem longicrurem Fig. 4. a. brevicrurem, frequentiorem 4. b. exprimunt.

## A 5. SCARABAEVS BONASVS;

Tab. A. Fig. 5.

Coprideus, aeneus, galea centro subcornuta, postice cornibus duobus arcuatis, reclinatis, thorace bituberculato gryeo-marginato.

*Scarabaeus Bonasus FABRIC. Entom. p. 23. n. 90. GOETZE Entom. I. p. 69.  
Scarabaeus Vacca SCHROETER Abhandl. I. tab. 3. fig. 5.*

Specimen inter alia Indiae orientalis Insecta communicavit *Illiustriss. Lib. Baro à RENGERS.* Pro Scarabaeo Vacca LINNAEI perperam a SCHROETERO l. c. p. 362. habitus hic fuit, nec iconem citatam hujus prius vidi, quam cum aeri incisa jam esset nostra.

#### DESCRIPTIO.

Forma simillimus Sc. Tauro europaeo, sed triplo maior, paulo que latior.

*Galea* magis semicircularis, argute marginata, futura disci semicirculari, margini subparallelia, ambiente centrum conicum subcornutum, acutissimum. Postici galeae anguli producti in cornu utrinque sulcatum, arcuatum, thoraci adplicatum, quorum interiores acies argutae semicirculariter per nucham continuantur.

*Clypeus* transversim ovalis, obsoletissime didymus, convexus, politus, antice in intervallo cornuum capitis obsoleto bituberculatus, punctisque impressis sparsus; utrinque ad caput angulo marginis prominulus, versusque laterales margines utrinque cicatrice notatus; per ambitum gryseo - marginatus.

*Elytra* vix thorace longiora, planiuscula, obsolete septemfalcata, fusco gryseoque nebulosa, abdomen non totum tegentia, ut in Sc. Tauro.

*Pedes*, uti thorax subtus, pubescentes; antici paulo maiores, tibiis obtuse dentatis.

*Corpus* fusco gryseoque nebulosum, galea et thorace aeneis. Femora pedum subovalia, grysea, margines, maculaque lanceolata fusco-aenea.

*Figura 5.* Insectum non plane magnitudine exprimit. An Femina, ut in Sc. Tauro nostrate, cornibus careat? observent alii, ne species, ut in hoc genere saepe fit, multiplicentur.

## A 6. SCARABAEVS GIBBVLVS;

Tab. A. Fig. 6.

Coprideus, ater, galea postice biangulata, clypeo trituberculato, elytris gryfeis nigro punctatis.

? Copris obscure aeneus, capite pone bicorni, thorace antice prominente, elytris rufis, nigro maculatis GEOFFR. paris. I. p. 90. sp. 5.

In deserto circa Lacum salsum Inderensem aliquoties lecta alias nunquam visa species.

## DESCRIPTIO.

*Magnitudo* dupla vel tripla Sc. Tauri, quo paulo oblongior.

*Galea* semiovalis, vertice futuris binis transversim parallelis, argutis, postice biangulata.

*Clypeus* antice trituberculatus, intermedio maximo, didymo, prominentiore. *Punctum* obsoletissime impressum utrinque versus marginem lateralem.

*Elytra* longitudine thoracis, laevia, gryfeo - lutescentia, atomis sparsis nigris. Reliqua violaceo - atra; pedesque ut in affinibus. Vide Fig. 6.


## A 7. SCARABAEVS SCRIPTVS;

Tab. A. Fig. 7.

Coprideus niger, galea bidentata, clypei callis laevigatis, elytris sulcatis, punctis linearibus canis ordine duplici.

? Scarabaeus Koenigii FABRIC. Entom. p. 29. n. 114. GOETZE Entom. I. p. 100.

Videtur in continenti Indiae orientalis admodum vulgaris esse; inter omnia enim Insectorum Bengalenium atque Coromandelicorum supplementa, quae ab amicis habui, frequens erat, interque tredecim specimina varietatem nullam observo. Simillimum legi circa Lacum Inderensem deserti tatarici.



## DESCRIPTIO.

*Forma* proxime refert Sc. Mopsum, sed *magnitudine* parum superat Sc. Taurum.

*Galea* rhombica transversim, antice argute crenata, dentibus duobus acutiusculis: disco scabriuscula, linea longitudinali duobusque punctis politis.

*Clypeus* thoracis convexus, scaber & gryseo tomento velut pulveratus, linea longitudinali polita, postice foveolam scutellarem includente, punctisque utrinque duobus tribusve vel pluribus detritis politissimis.

*Elytra* lateribus sinuata, septemfulcata, fulcis punctatis, interiectis porcis convexis, quorum alterni tres ad basin & pone medium interrupti spatio cano - tomentoso; unde oritur duplex ordo punctorum albicantium linearium, sex in singulo ordine longitudinaliter parallelorum.

*Pedes* graciles, postici multo longiores; primorum tibiae tridentatae.

*Abdomen* cano pulveratum, utrinque sub sinu elytrorum puncto laterali cano - tomentoso. Caeterum insectum exfolete nigrum, thorace quibusdam subaeneo.

In *Figura* 7. pictor lineolas albas elytrorum paulo angustiores exprimere debuisset.

## A 8. SCARABAEVS AMMON;

Tab. A. Fig. 8. A. B.

Stercorarius ater nitidus, capite thoraceque cornutis, maxillis exsertis subramosis.

Scarabaeus polyceros (Foemina) PALL: *itin. I. app. p. 461. n. 22. GOE. TZE Entom. I. p. 116.*

Scarabaeus Ammon PALL. *itin. III. app. p. 707. n. 50.*

Maxime frequens species in deserto sabuloso Naryn, medio inter Volgam & Iaicum sita, ubi Iunio nocturno tempore ad pascua equorum circa peregrinantium castra convolat, sumumque canalibus perpendiculis

dicularibus profunde in arenam scaturiginosam defodit, multum egestans fabuli. Vterque sexus stridet ad tritu abdominis ad elytrorum marginem, ut Sc. stercorarius. Ad Volgam in arenosis vere nusquam deest, rarius & velut transfuga ad Iaicum, & ultra per desertum tataricum.

### DESCRIPTIO.

Proxime affinis & assimilis Sc. Typhoeo, sed plerumque duplo triplo major, & rara specimina pygmea isti aequalia. Totus aterrimus, nitidus.

*Maxillae* in utroque sexu prominentes, apice bifidae, exterius dente insigni adsurgente; quasi affinitate quadam cum Lucanis. *Galea* ante oculum utrinque unidentata.

*Clypeus* convexus, utrinque ad caput circumscriptione semicirculare, sulco longitudinali obsoleto & utrinque puncto impresso versus marginem; margine subtus pilis reflexis ciliatus. *Scutellum* insigne cordatum. *Elytra* politissima, fulcata.

*Pedes* magni, robustissimi: *tibiis* omnibus dentatis, pilosissimis, posticis versus anum remotis, magis quam in Stercorariis reliquis. Haec in utroque sexu.

*Mas* (fig. 8. A.) cornu frontis antrorsum surrecto, thoracis directe protenso, subulatis, convergentibus, longissimis.

*Foemina* (fig. 8. B.) cornu galeae brevi geminato, uno pone alterum; thorace antice spinis duabus brevibus, latitudine fere capitis inter se remotis.

Icones perfectissimam magnitudinem referunt.

### A 8. SCARABAEVS TENEBRIOIDES;

Tab. A. Fig. 9.

Phytopagus? ovatus piceus, glaber punctato-scaber, clypeo margine ciliato.

In campis glareofisis, aridis, inter Ononem & Argunum fl. Dauriae, Majo ad primos vernos calores appetet, interdiu humi immobilis.

B

## DESCRIPTIO.

*Magnitudo* fere Sc. solstitialis, formaque diversa. *Galea* latior, marginata: *clypeus* ad latera dilatatus, distinctus marginatus, pilis gryfeis subtilissimis ciliatus, praesertim antico posticoque margine conspicuus. Caeterum niger, minus nitidus, punctis crebris, impressis, sparsis scabriusculus. *Elytra* picea, apice rotundata, breviora, ut cauda longius promineat, sed obtusa. *Scutellum* nitidum. *Tibiae* robustissimae, anticae tridentatae. *Antennarum* clava minima.

Icon (Fig. 9.) solitam magnitudinem ad amissim refert.

## A 10. SCARABAEVS PECTINATVS;

Tab. A. Fig. 10:

Silphoides <sup>a</sup>), thorace rugoso, elytrorum porcis spinuloso - pectinatis, porcis interjectis duplii serie punctatis.

Trox horridus FABRIC. Entom. append. p. 818.

Inter exotica utriusque Indiae Coleoptera ad me missus est, ut veram patriam determinare non auferim. FABRICIVS Indicum dixit.

## DESCRIPTIO.

*Magnitudo* fere Dytisci scarabacoidis; *facies* proxime Sc. fabulosi, magisque similis Sc. monacho VOET. coleopt. tab. 10. fig. 13.

*Caput* planum, intra thoracem semiretractile, supra in medio cristula transversa, denticulata, medio interrupta. *Antennarum* articulus basilaris pilis barbatus.

*Thorax* gibbus scaberrimus, postice erofo - sinuatus, porcatus rugis quatuor crassis, longitudinaliter parallelis, quibus interjecti sulci profundi scabri; lateribus *clypeus* late marginatus, pilisque brevibus confertim ciliatus.

<sup>a</sup>) *Silphoideos* appello *Scarabaeos*, qui pti contractis artibus immobiles sunt, facie, elytrisque tuberculosis Silphas quasi ut Byrrhi, & verosimillime omnes, ut dam, praesertim fabulosam, referunt, ca- Sc. fabulosus, sub morticiniis vivunt.

*Elytra* integerrima, subcoalita, marginata, margo & porci quatuor longitudinales, arguti, spinulis confertis pectinati, sutura vero inermis. Interjecti fulci plani, in singulo elytro quini, dupli serie punctorum profunde excavatorum impressi.

*Pedum* tibiae prismaticae, fetulis hispidae, anticae subdentatae.

*Corpus* totum nigrum, sine nitore, subtus glabrum, planiusculum.

Icon *Fig. 10.* magnitudinem & formam optime illustrat.

## A II. SCARABAEVS MORTICINII.

*Tab. A. Fig. II.*

*Silphoides*, clypeo inaequali ciliato, clytris striatis, convexae punctatis, hispidulis.

In aridissimis Tatariae desertis ad Iaicum & frequentius ad Irtin, sub cadaveribus aestivo ardore exsiccatis cum Histeribus & Dermestibus hospitatur. Ani ad elytra adtritu stridet, ut & Sc. fabulofus.

### DESCRIPTIO.

*Magnitudo* Sc. Fosforis; corpus sine nitore totum nigrum.

*Caput* subtus ferrugineo pubescens, galea marginata, plana, integerrima.

*Clypeus* latere marginatus, elegantissimeque gryseo ciliatus, ut & in commissura posteriore; impressionibus variis inaequalis. *Pectus* pilis gryseis sparsum.

*Elytra* integerrima, externo margine ciliata, striis decem obsoletis, impresso - punctatis, interque striae quasi imbricata tuberculis laevigatis seu areolis, transversim interstinctis per impressiones pilis aliquot gryseis sparsas. — Specimina ad Irtin lecta inter striae areolas glabras, & pilis brevissimis in annulum dispositis coronatas alternatim continuant; caeterum simillima.

*Pedum* priorum femora latissima, in aciem compressa, antice ferrugineo villosa; *tibiae* (non omnibus exemplis) valide dentatae: reliquorum pedum prismaticae, exterius hispidae.

## OBSERVATIO.

Licet *Sc. fabulosa* valde similis sit haec species, tamen ipsa forma, circumscriptione magis oblonga, thorace ciliato, elytris frequenter striatis, nec quadrifariam tuberculatis, essentialiter differt. Contra *Scar. tuberculatus* DEGEER *inf. IV.* p. 317. *tab. 19. fig. 2.* quem Noveboraco Americes habeo, a varietate majuscula *Scar. fabulosi*, quam in transbaicalensibus & australioribus Russiae legi, nullo modo distingui potest. — Est vero distinctissima, a descriptis hisce, species, quartaque adeo hujus affinitatis, quam Monachi grysei nomine pulcre delineavit VOET. *I. c. tab. 10. fig. 93.* Specimina hujus, quae ex ora cis-gangetica Indiae sub oculis habeo, inter se convenient, capite thoraceque cinereis; galea bituberculata, thorace hiulco pilis brevissimis sparso, postice in angulum producto, lateralibus marginibus denticulato; elytrorum tuberculis per novem series digestis, perque alternas series majoribus, praesertim in dorso prominentissimis. Femora antica item lata, in aciem compresa, tibiae bidentatae; corpus subtus totum cinereum pilis brevissimis sparsum.

## A 12. SCARABAEVS COCCINELLOIDES;

Tab. A. Fig. 12.

Stercorarius, oblongus, muticus, ater: clypei lateribus rufis; elytris rubris, macula orbiculata nigra.

*Scarabaeus bimaculatus* LAXMANN. *Nov. Com. Petr. Tom. XIV.* p. 593.  
*tab. 24. fig. 1.*

*Scarabaeus (bipunctatus) muticus*, thorace nigro, rubro marginato, elytris rubris, punctulis duobus nigris magnis LEPECHIN. *itin. ruf. Tom. II.* p. 324. *tab. 10. fig. 7.*

In australibus Russiae & ad Volgam, sub fimo equino recenti paucim occurrit.

## DESCRIPTIO.

*Magnitudo Scar. Fosforis*, nitidissimus, totus laevis, oblongus, convexus. *Clypei margines laterales & anus coccinea. Elytra laevissima*

rubra, singula macula in medio orbiculata nigra, & apice nigro - marginata. *Tibiae* testaceae. *Caetera* niger; & icon *Fig. 12.* vix ampliorem descriptionem sibi postulat.

## A 13. SCARABAEVS BIMVCRONATVS;

Tab. A. Fig. 13.

*Phytophagus testaceus*, tibiis anticis majoribus barbatis, clypeo utrinque mucronato, villis fimbriato.

Species haec notatu dignissima, Sc. longimano proxime affinis, inter Insecta Amboynensis mihi adlata, & nulli, quod sciam, descripta fuit.

## DESCRIPTIO.

*Magnitudo* fere dupla Sc. Eremitae; depresso, *habitu* Sc. longimani.

*Galea* antice producta, marginata, margine rectilineo, lamellis lateralibus oculorum globos maximos, flavescentes secans. *Oris labium* superius inferiusque pilis ferrugineis penicillata, *antennarumque* infimus articulus pilosus.

*Thorax* supra convexus, punctis impressis cicatricosus, margine utrinque in *mucronem* recurvum eductus, & ante *mucronem* ferrulatus, pone eundem excisus, integer, posticis angulis acutissimis. *Subtus thorax* ferrugineo villosus, densissime versus marginem, ubi villi marginem superminentes quasi fimbriam efficiunt. *Pectus* inter pedes item villosum.

*Elytra* laevia, planiusculo - convexa, marginata, integerrima, superficie instar corii obsolete cicatrica, abdominis apicem non tegentia.

*Pedes* magni, robusti, antici maiores, femoribus dente acutissimo in medio notatis. *Tibiae* arcuatae, triquetrae, interius villis ferrugineis, opposite crispatis, bifariam barbatae; exteriore angulo dentatae, tribus versus extremitatem dentibus majoribus remotissimis; superiore angulo spina unica longiore armatae. *Pedes* reliqui subpilosii, postici (prae-sertim femoribus) robustissimi.

*Color* insecti piceus, elytrorum pedumque testaceus purpurascens.

Icon *Fig. 13.* naturali magnitudine tantillo minor est.

## A 14. SCARABAEVS OXYPTERVS;

Tab. A. Fig. 14. a. b.

Phytopagus, oblongus auratus lanuginosus, elytris dehiscentibus, acutis, gryseis, striis tomentosis.

? Scarabaeus Alepenis parvus, villosus, vaginis e fusco aureoque mixtis PE-  
TIVER. gazophyl. tab. 2. fig. 12.

Scarabaeus oxypterus PALL. itin. I. app. p. 462. n. 26. GOETZE Entom. I.  
p. 114. n. 230.

Scarabaeus (acuminatus) muticus, corpore viridi, elytris flavis corpore bre-  
vioribus, apice acuminatis LEPECH. itin. ruff. I. p. 508. tab. 16. fig. 9.  
GOETZE Entom. I. p. 96. n. 125.

Melolontha vittata FABRIC. Entom. p. 40. sp. 40. GOETZE Entom. I.  
p. 106. n. 181.

In maxime australibus ad Iaicum flores frequentat, neque prae-  
terea ullibi observatus fuit. Viget ineunte Julio. Descriptio, quam in  
Itinerario dedi, e speciminibus in muria lacus Inderiensis lectis, imperfe-  
ctior nata est.

## DESCRIPTIO.

*Magnitudo* media inter Sc. horticolam & solstitiale; *Facies* sin-  
gularis.

*Galea* aurata, inter oculos angustius producta. *Antennae* clava  
in utroque sexu fere aequali.

*Thorax* oblongus, cum capite scutelloque, viridi vel cupreo au-  
ratus, undique albido lanuginosus. *Pectus* aureolum, *abdomen* rufo - testa-  
ceum, tota vellere denso albido obducta.

*Elytra* gryseo - lutescentia, viridi nitore inaurata, apice acuto  
dehiscentia, abdomine breviora, virgata striis quaternis cano - tomento-  
sis, in apicem cœuntibus; versus basin evanidis.

*Pedum* femora cupreo - aureola, tibiae testaceae, anticae digita-  
tae; tarsi quatuor posteriorum elongati.

In foemina (fig. 14. b.) lanugo omnis flavescit; clytra abdomine  
breviora, acuta vix in acumen producta. *Mas* (fig. 14. a.) viridior, la-

nuginc albida, elytrorum mucronibus productis, in siccato infecto ab domine longioribus; in recenti subaequantibus.

## N O T A.

Adlegata synonyma pro specimine esse possunt, quam pessimo exemplo compilatores hodie species multiplicent; cuius innumera documenta allegari possent. Quanta farrago scientiam naturalem opprimet, si sic pergatur?

## A 15. SCARABAEVS ALOPECIAS;

*Tab. A. Fig. 15. a. b.*

*Phytophagus*, oblongus, villofissimus, thorace inaurato, elytris obtusis lanuginosis gryseis, abdomine testaceo.

? *Scarabaeus syriacus* LINN. *mus. regin.* p. 24. *syst. XII.* p. 553. *sp. 56.*

In desertis australibus ad Volgam, cum *Tulipa Gesneri*, paulo ante hujus florescentiam, copiosissime apparent foeminae; at mares (minus frequentes) paulo tardius, medio demum Aprili, simul cum *Sc. hirtello*. Apparent tunc ubique interdiu vagi, inque floribus Tuliparum quiescentes & nuptias agentes. Larva verosimillime Tuliparum bulbis vicitat.

## DESCRIPTIO.

Praecedente, cui habitu & forma oblonga similis est, minor & teretior.

*Caput* villosum, latiusculum breve: *antennarum* clavae in utroque sexu subglobosae.

*Thorax* subovalis, brevior quam in praecedente, undique villofissimus, convexus.

*Elytra* planiuscula, villoso-pubescentia, abdomine vix breviora, apice obtuso subdehiscentia, ora nigra marginata in utroque sexu.

*Pedes* omnibus aenei, hirsuti, primores breves, tibiis dentatis; reliqui longi, tenues, tarsis praesertim elongatis.

*Mas* (Fig. 15. a.) capite, thorace, scutelloque viridissimis, fericeis; pectore abdomineque nigris; elytris gryseis, interdum viridi - nitentibus, tenuius & striatim villosis; lanugine totius corporis albida, rarius in abdominis circumferentia lutescente, tenellisque pilis fuscis subinde fasciculatim mixta.

*Foeminae* (Fig. 15. b.) caput, thorax, scutellum cupreо - aurata, abdomen rufo - testaceum, elytra magis lutescentia, villosissima; vellus totius corporis intense fulvum. Corpus huic fere majus.

### A 16. SCARABAEVS ARCTOS;

Tab. A. Fig. 16.

*Phytophagus*, oblongus, villosissimus ater, elytris gryseis, dehiscentibus, lanuginosis, ano rubro.

In deserto australi inter Cumam & Terekum fluvios in floribus abundat initio Maji; ad matutinum praesertim solem obvolitans.

### DESCRIPTIO.

Praecedente major, & Sc. oxyptero fere par; oblongus, depresso - fuscus, totus, praeter elytra, aterrimus & prolixo lanugine hirsutus.

*Caput* breve, galea quasi nulla tectum, fere Meloidis, fasciculatim villosum. *Antennarum* clavae in utroque sexu globosae.

*Thorax* subrotundus, politissimus; undique villosus.

*Elytra* fusco - grysea, basi & per strias longitudinales pallide lanuginosa, planiuscula, abdomine subbreviora, obtuso - dehiscentia.

*Abdomen*, uti totum insectum, molliusculum, apice subacuto rubro, in foeminis elytris paulo longius, masculis plerumque ad apicem utrinque fasciculo villorum ferrugineo distinctum.

*Pedes* longi, graciles, postici quatuor praesertim tarsis maxime elongati.

Icon Fig. 16. exprimit marem; ideoque abdomen elytra haud excedens.

## A 17. SCARABAEVS BOMBYLIFORMIS;

Tab. A. Fig. 17.

Phytophagus, oblongus, villossissimus ater, elytris abdome brevioribus, tomentoso - fulvis.

Copiosum observavi in aridissimis, praeruptis Montis & Lacus salini Bogdo, in deserto australi ad Volgam, ubi ineunte Majo mane & ad meridianum usque solem flores, praesertim Tragopogonis crocifolii frequentabat, prompte volitans, & facie Bombylii imponens. Eundem vere ex Inderiensi Lacu muriatico lectum accepi.

## DESCRIPTIO.

Ita affinis praecedenti, ut diu haesitaverim, an pro distincto effet habendus. Sed est multo minor, ano in omnibus concolore nigro, elytris semper abdomine multo brevioribus, & intense fulvis, tomento continuo sericeis; caeterum planiusculis & obtuso dehiscentibus, ut & reliqua simillimus, & pariter, ac praecedens, tenui crusta molluscus. Vellus totius infecti aterrimum, & prolixius densiusque etiam, ac in priore.

Icon Fig. 17. differentias optime exprimit.

## A 18. SCARABAEVS ALBELLVS;

Tab. A. Fig. 18.

Phytophagus, depresso - angulatus, niger, thoracis lateribus, maculisque elytrorum anique albatis.

Scarabaeus albellus PALL. itin. I. app. p. 462. n. 27. GOETZE Entom. I. p. 114. n. 231.

Cetonia variegata FABRIC. Entom. p. 51. sp. 40. GOETZE Entom. I. p. 111. n. 214.

Hujus speciei, nobis rarissimae, aliquot exempla circa Lacum salinum Inderensem, deserti tatarici, collegi, nec usquam alibi. FABRICIUS eandem ex India orientali a KOENIGIO habuisse videtur.

C

## DESCRIPTIO.

Sc. stictico fere altero tanto major, eidemque forma & facie similis, itidemque glaber, sed minus nitide ater. — *Clypeus* lateribus fascia alba marginatus. *Elytra* lunulis majusculis maculata, quarum grandior ad ipsum apicem. *Alvis* ultra elytra nudus albo bimaculatus. Subtus totus immaculatus ater. *Caput* exiguum. Reliqua indicat Fig. 18.

## A 19. SCARABAEVS SVCCINCTVS;

Tab. A. Fig. 19.

*Phytopagus*, depresso - subangulatus, flavo - lanuginosus, elytris nigris, gryseo bifasciatis.

Observatus in sola Dauuria, locis nemorosis, subalpinis, ubi Lilia, praesertim Lil. bulbiferi flores frequentat. Varietatem non esse Sc. fasciati, a loco natam, probat hujus in ipsa Dauuria immutati praesentia.

## DESCRIPTIO.

*Scar. fasciato* similis, at minor, lanugine adhuc largiore vestitus, flavicante, circa anum, nigra. *Elytra* itidem abdomine breviora, truncata; nigra, nitida, pubescentia: fasciis in medio binis parallelis, gryseis, nequaquam vel vix secundum futuram confluentibus. Reliqua ex figura 19. patent.

## A 20. SCARABAEVS AVREOLVS;

Tab. A. Fig. 20.

*Phytopagus*, depresso - subangulatus, polline aureolus, thorace elytrisque nigro punctatis.

Iunio mense haec species, in Rheo compacto florente, per Dauuriam ubique frequens appetit, constanter ab affini Sc. farinoso LINN. f. argenteo, punctis diversus. Rarior ad Ieniseam.

## DESCRIPTIO.

*Scar. farinoso*, apud nos in australioribus usque ad Obum fl. frequenti, ita similis *forma*, ut ovum ovo. *Pedes* postici itidem maximi, monodactyli; tibiis crassioribus, compressis, hispidis. *Corpus* coloratum polline, subtus in omnibus argenteo virescente, sed supra plerumque pallide aureo. *Puncta* nuda, picea: thoracis quaterna; in elytris dupli- ci serie octona, solitariaque versus apicem. *Pedes* polline sparso micant, nigricantes. — Diu inter flores, pluviosa praesertim tempestate, ver- fanticibus pollen sensim deteritur, et turpis facies.

## A 21. SCARABAEVS HOLOLEVCS;

*Tab. B. Fig. A 21.*

*Phytophagus*, cylindraceus, antennis heptaphyllis, totus farinoso - albus immaculatus.

*Scarabaeus albus* PALL. *itin. II. app. p. 718. n. 41.* GOETZE *Entom. I. p. 114. n. 233.*

In australibus desertorum ad Iaicum & Irtin, locis fabulosis Elymo obsitis sub finem Iunii appetet noctivagus; interdiu sub Elymo are- nario quiescens.

## DESCRIPTIO.

*Forma* omnino Sc. Fullonis & par fere magnitudo. *Galea* labio superiore productior, quam in eodem, sinu obsoletissimo emarginata. *Antennae* masculis clava maxima, heptaphylla. *Corpus* totum tomento paleaceo candidum; *pectus* vellere cinerascente - albo. *Tibiae* posticae villis barbatae. — Reliqua loquitur icon *Tab. B. Fig. A 21.*

## A 22. SCARABAEVS TESTACEVS;

*Tab. B. Fig. A. 22.*

*Phytophagus*, cylindraceus, totus testaceo - glaber, com- missura thoracis pallido villosa, abdomine glauco.

C 2

In fabuletis Anketeri, inter Cumam & Caucasum, non infrequens vere.

### DESCRIPTIO.

*Magnitudo Sc. Fullonis*, sed oblongior, magisque cylindricus.

*Galea* supra os margine valde reflexa, obtuse emarginata. *Antennae* clava parva, triphylla, rufescente.

*Thorax* gibbus, aequalis, a corpore distinctissimus, punctatus, utrinque versus marginem lateralem cicatrice obsoletissima. Margo thoracis anticus ciliis confertis fulvescentibus fimbriatus, subtus elongatis; posticus substratus villis longioribus pronis, gryseo flavescentibus.

*Elytra* abdomine breviora, scabriuscula, obfoletissime trinervia. *Pedes* robustius dentati, quam in Fullone.

Caput, thorax, pedes picea; elytra & abdomen testaceo purpurascens. Abdomen postice conico - producetur, obtusum, ut in Fullone, & cum pectore glauco polline obumbratum.

Icon Tab. B. Fig. A 22. solitam magnitudinem exprimit.

### A 23. SCARABAEVS HEMISPHAERICVS;

Tab. B. Fig. A 23.

Coprideus, hemisphaericus, apterus ater opacus; galea inermi, semiorbiculata, antice obtuso bidentata.

Species insignis, mihi ignotae originis, quam ad exemplum in Museo Academiae Petropolitanae asservatum delineari feci & descripsi; inter Coprides inermes facile e maximis.

### DESCRIPTIO.

*Moles* supra Scar. sacrum; sed rotundior, aequaliterque & fere hemisphaerice convexus, subtus planiusculus.

*Galea* semiorbiculata, declivis, medio margine exciso - bidentata, denticulis distinctis rotundatis; supra tractus bini obsolete angulati, ab utroque oculo ad verticem ducti, versus marginem divergentes.

*Clypeus* magnitudine elytrorum & aequali cum his convexitate, marginatus, laevissimus. *Elytra* connata!

*Pedes* longiusculi: primores tibia latiuscula, exterius obtuse tridentata; reliqui tibiis triquetro - subquinquangularibus, exteriore margine tridentatis atque denticulatis, reliquis angulis denticulato - scabris. *Femora* crassa, punctis sparsis excavatis.

Insectum totum (Fig. A 23.) laeve, aternum, sine nitore (ut Sc. faser). Caput subtus fusco - villosum & commissura anterior thoracis subtus villis ferrugineis ciliata.

### A 24. SCARABAEVS CRVENTVS;

Tab. B. Fig. A 24.

*Phytopagus* depresso - angulatus, niger, thorace supra elytrisque disco rubris, punctis elytrorum abdominisque crebris albis.

Inter Infecta Noveboracensia hunc misit Nobil. DNa. Anna BLAKEVRN.

### DESCRIPTIO.


*Magnitudo & forma* ad amissim Scarabaei strictici. *Pectus & femora* minus lanuginosa.

*Caput* nigrum; oculis subtestaceis, galea supra os producta emarginata.

*Thoracis* clypeus ruber, antice nigro marginatus, lineola alba utrinque secundum marginem lateralem, maculisque duabus nigris disci.

*Elytra* abdomen non totum tegentia, nigra per ambitum, medio singula disco rubra; lunulis transversis albis, una ad medianam futuram, tribus ad marginem lateralem.

*Corpus* atrum, politum, punctatum: *macula* tomentoso alba utrinque laterum pectoris, sub ipso margine elytrorum. *Puncta* alba abdominis in singulo segmento utrinque marginali, & in ultimo duo subtus, unum in ipso apice, & quatuor supra, pone elytrorum margines. Reliqua explicabit Figura.

B. I. *CVRCVLIO VARICOSVS;**Tab. B. Fig. 1.*

*Longirostris, femoribus dentatis, elytris connatis sulcatis supra sextuberculatis, postice bimucronatis.*

Insectum inter maximos hujus generis referendum, ex America meridionali oriundum; Curculioni vaginali LINN. & ejus iconi ab Ill. DEGEER (*inf. V. p. 266. t. 15. f. 23.*) propositae, licet simillima, tamen adtentius conferentibus satis distincta species videbitur.

## DESCRIPTIO.

*Magnitudo* fere Curc. palmarum; totius color ater, nitidus.

*Rostrum* thorace longius, teres, extremo depresso - sculum, in fosfam sterni, inter medios pedes, repositile. *Antennae* tenues, fractae, clava exigua.

*Thorax* supra politissimus, convexus, utrinque gibbus.

*Elytra* coalita, durissima, sulcis singula decem impresso - punctatis exarata, axillis conice prominula, versus apicem gibba, ipsoque in apice spina acutissima armata. Tubercula dorsalia utriusque simul elytri sex in circulum posita, prominentissima polita, postica maxima; postice puncta tria prominula in quovis elytro, & porcus futurae proximus tuberculis minutis imbricatus.

*Pedes* robusti, (antici vix majores) femoribus subtus omnes unidentatis, interque dentem & articulum coarctata; *tibiae* apice in spinulam terminatae, areolaque ad apicem ferrugineo holoserica notatae; *tarsi* subtus ferruginei.

Iconem *Fig. B. I.* a dorso delineari malui, dum sic melius coleopterorum circumcaesuram exprimi autumo, quam a latere, vel oblique inspectis.

B 2. *CVRCVLIO RHYNCHOCEROS;*  
*Tab. B. Fig. 2.*

*Longirostris, femoribus dentatis, elytris connatis tuberculatis mucronatis, rostro basi bicorni.*

Simul cum praecedente mihi adlatus, Americanus; & hic omnino iconem Curc. vaginalis ex Ill. DEGEER opere citatam referret, nisi rostri cornua prominentissima distinguerent, quorum mentionem nullam fecit DEGEER. Summa tamen similitudo vel omissionis vitium subesse, vel sexum hisce cornibus distingui, fere suadet.

DESCRIPTIO.

*Paulo brevior & latior praecedente, minus politus, ater.*

*Rostrum* infracto - arcuatum, in ipso arcus angulo utrinque cornutum *spina* robusta, subarcuata, patentissima: a basi dorsum rostri subangulatum, in medio obsoletum fulcatum, extremo planiusculum, latius, ore emarginatum. *Antennae* crassius clavatae.

*Thorax* supra inaequalis, utrinque gibbus, supraque gibbos tuberculo detrito notatus. *Fossa sterni* pro recipiendo rostri apice.

*Elytra* coalita, humeris angulata, postice gibbula, apice brevius bimucronata, foveolis per decem fulcos digestis postice exiliорibus exarata. *Tubercula* dorsalia in circulum disposita, minora quam in praecedente, octona, quorum postica duo duplicata; praeterea minuta duo suturalia.

*Pedes* robusti; antici gradatim majores; femora dente obsoletiore, minusque constricta, quam in praecedente. *Tibiae* ut in praecedente.

Iconem a dorso inspecti (Fig. 2.) dedi, a latere circumcaesuram nostri exempli ad amissim refert figura *Degeeriana*.

B 3. *CVRCVLIO PICEVS;*  
*Tab. B. Fig. 3.*

*Longirostris, totus ater glaber, thorace ovato, elytris ab domine brevioribus, substriatis.*

*Curculio piceus* PALL. *itin. I. app. p. 464. n. 34.* GOETZE *Entom. I. p. 384. n. 67.*

E muria Lacus Inderiensis frequentem legi, alias per deserta Tatariae nusquam.

#### DESCRIPTIO.

*Formae* similitudo mira cum Curc. palmarum; at magnitudo vix Curc. fulcirostris.

*Rostrum* tenue, teres, longitudine thoracis, arcuatum. *Antennarum* clava globosa, subtestacea.

*Thorax* ovatus, depresso-culus, circa caput annulo marginatus, totusque punctis minutis, impressis sparsus.

*Corpus* subitus magis gibbum. *Elytra* planiuscula, abdomine breviora, obtusa, striis denis tenuissime arata & inter strias punctis, uti thorax, impressis sparsa.

*Pedes* antici majores, robustiores, praesertim femoribus; tibiae omnes scabrae, interius pilis ciliatae.

Insectum (*Fig. 3.*) totum nigrum, parum nitidum, glabrum.

#### B 4. CVRCVLIO ANOMALOCEPS; Tab. B. Fig. 4.

Brevirostris, oblongus femoribus dentatis, rostro tetragono forcipato, antennis moniliformibus.

*Curculio dispar* LINN. *mus. regin. p. 50.* Varietas? FABRIC. *Entom. p. 144. n. 87.* Varietas?

Insectum forma perquam singulare, atque inter Curculiones antennis non fractis, & Ipsides seu Attelabos involvulos LINNAEI prorsus ambiguum, immo forsan reete ad hos referendum, licet proxime sit affine Curc. Anchorage et affinibus. Specimen inter alia ab amiciss. DRVRY habui, qui e Rio - Ianeyro Americes accepit.

#### DESCRIPTIO.

*Magnitudo* supra Curc. paraplecticum & longior, formaque peculiari.

*Caput* postice semiglobosum politissimum, usque fere ad oculos, quasi decorticatum, ubi annulariter (abrupte velut margine) incrassatur.

tur. *Rostrum* breve, tetragonum, terminatum forcipe nuda producta, gracili. *Antennae* non fractae, in medio rostro positae, longitudine totius capitis, moniliformes.

*Thorax* ovatus, inflatus, vix depresso. *Elytra* fulcis decem profunde scrobiculatis arata, apice integra, exteriusque denticulo a sutura remoto mucronata.

*Pedes* robusti, antici majores, femoribus omnes subclavatis, subtus denticulo versus apicem strictiorem notatis.

*Color* insecti sine nitore piceus; subtestaceus politus in capite, pedibus, abdome. *Elytra* lineolis fulvis politis notata, una suturae utrinque parallela a basi ad  $\frac{2}{3}$  longitudinis ducta; exteriore altera in medio flexuosa, ad basin non perducta, sed posteriore; tertia versus apicem transversa, arcuata; ultima in mucronem apicis ducta, longitudinali.

*Figura 4.* descriptionem illustrabit.

#### OBSERVATIO.

Tria distincta Insecta habeo, Curc. anchoraginis similitudine, Americanae originis, non Indica:

1. *CVRCVL. anchorago*, descriptioni Linnaeanae in *mus. reg. p. 52.* proxime respondens, nitide niger, *capite* elytrorum longitudine, lineola rubra notato, antennis valde incrassatis; *thorace* elytris paulo breviore, oblongo, in medio non coarctato, per totam fere longitudinem fulco longitudinali canaliculato; *elytris* obtusis minus nitidis, laevissime sulcati, linea longitudinali rufa, suturae parallela, varie interrupta. Hunc delineat, sed nostro minorem DEGEER *Ins. V. t. 15. f. 28.*

2. *CVRCVLIO hostile*. Multo longior & tenuior praecedente, crassitie vix Libellae Puellae, *longitudine* fere sesquipolllicari, cuius aquas partes efficiunt caput, thorax & elytra. *Rostrum* tenuissimum, extremo subarquatum; *antennae* rostro multo breviores. *Thorax* medio coarctatus, antice subclavatus convexus, postica parte crassiore, supra fulco canaliculata. *Elytra* apice subacuminato obtusiusculo abdomen excedentia laevissime sulcata, linea integerima & rectissima longitudinali,

D

fulva, externo margini propiore. *Pedes* minores. *Infectum totum aterrimum*, magisque politum, quam 1.

3. CVRCVLIO *Druryanus*. A C. *dispare* LINNAEI, quocum apud FABRICIVM confunditur, certe distinctus, vix dimidia praecedentium longitudine, sed habitiore corporis crassitie ad C. *paraplecticum* proprius accedens. Hic totus acneus; *thorace* tereti, nullo sulco; *rostro* longitudine thoracis, summo apice dilatato; *antennis* rostro multo longioribus; *elytris* apice spinula a futura remota mucronatis, fulcis duobus futurae, uno exteriori margini parallelis, intermedio spatio laevigato, aliquot maculis flavis notato, quae in figura apud DRVRY icon. tab. 42. fig. 3. 7. non expressae sunt. Hanc ad C. *anchoraginem* male citat DEGEER, ad C. *disparem* FABRICIVS; est tamen priori similior. At C. *anchorago*, inter C. *Druryanum* & C. *hastiformem*, proportione formae, medium locum tenet. Femora in his omnibus *spinula* notata.

### B 5. CVRCVLIO INDERIENSIS;

*Tab. B. Fig. 5.*

Brevirostris, apterus ovatus, opalino - albus, thorace utrinque mucronato, elytris excavato - punctatis.

*Curculio inderiensis* PALL. *itin. I. app. p. 464. n. 36.* GOETZEE *Entom. I. p. 402. n. 35.*

*Curculio albicans* LEPECH. *itin. ruff. I. p. 508. tab. 16. fig. 5.* GOETZEE *Entom. I. p. 399. n. 14.*

Hanc elegantissimam speciem circa Lacum falsum Inderensem copiose, sed alibi nunquam, legi.

### DESCRIPTIO.

*Mole* fere minoris fabae, forma Tenebrionum apterorum, brevis, crassus, ovato convexus.

*Rostrum* crassum, brevissimum, quadratum. *Antennae* fractae, sed articulo insimo perbrevi. *Thorax* punctis prominentissimis muricatus, utrinque mucrone reclinato, ut in Cerambycibus, armatus.

*Elytra* coalita, fulcis profunde impresso - punctatis. *Pedes* robusti, mutici.

*Corpus* totum albatum, subtus rosea & virescente resplendescens varians: abdomen lituris fuscis dupli ordine; oculi atri.

*Fig. 5.* naturalem magnitudinem refert, a qua nullum inter numerosissima specimina declinare vidi.

### B 6. CVRCVLIO NOMAS;

*Tab. B. Fig. 6.*

Crassirostris, dealbatus, rostro biporcato, thorace scaberri-  
mo, elytris fusco oblique lituratis.

*Curculio major*, subcinereus, undatus PETIV. gaz. t. 23. f. 4.<sup>2</sup>

*Curculio Nomas* PALL. itin. I. app. p. 463. n. 31. GOETZE Entom. I. p. 384. n. 66.

In aridissimis deserti caspici, maxime circa salinas & Lacus fal-  
los, non infrequens; deest in minus torridis, nec in Sibiria visus.

### DESCRIPTIO.

*Habitu* C. nebulosi & fulcirostris, sed major, & inter nostrates fa-  
cile maximus, longitudine 10.<sup>11</sup>

*Rostrum* longitudine thoracis, crassum, tetraedrum, albido, su-  
pra stria dupli prominente, ad frontem adproximata.

*Thorax* a dorso caelatura fere ut in Cerambyce scaberrimus s. tu-  
berculis muricatus, fascia utrinque longitudinali alba; fossa e regione  
scutelli profunde impressa, subcordata. *Scutellum* nullum, sed thorax  
eo loco angulatus.

*Elytra* obtusa, striis e punctis impressis compositis, versus basin  
punctis prominulis scabra, ex albida: umbris 2. obliquis fuscis. *Alae*  
lutescentes.

*Corpus* subtus cano-albidum, lorica abdominalis singula punctis in  
transversa serie nitidis atris 4 - 6.

*Pedes* albati, antici paulo maiores, medii minores. Vid. *Fig. 6.*

## B 7. CVRCVLIO CANDIDATVS;

Tab. B. Fig. 7.

*Crassirostris albato nebulosus, rostro stria trifurca, thoracis dorso cinereo, linea punctisque duobus niveis.*

*Curculio candidatus* PALL. *itin. I. app. p. 463. n. 32. GOETZE Entom. I. p. 402. n. 33.*

In aridis deserti caspici passim, sed frequentissime circa Lacum falsum Inderiensem lectus.

## DESCRIPTIO.

*Paulo major Curc. fulcirostri & crassior, pulcherrime dealbatus, subitus totus pedibusque (quorum antici majores) candido puro colore.*

*Caput oculis nigris. Rostrum supra striis tribus convergentibus, in fronte concurrentibus.*

*Thorax supra lateribusque punctis fuscis pulveratus, striga media candida & utrinque a dorso puncto magno candido; dein versus latera utrinque striga minus distincta & puncto laterali. Scutellum nullum, sed angulus thoracis.*

*Elytra striata, tota quasi niveo calcareo colore confertim maculata, intervallis macularum cinerascentibus, ubi striae fuscae. Id optimè expressum est iconē Fig. 7.*

## B 8. CVRCVLIO RORIDVS;

Tab. B. Fig. 8.

*Crassirostris, apterus, rufescente - albus, supra lituris punctisque subverrucosis nigris, porco rostri longitudinali.*

In falsis torridis deserti australis ad Volgam, circa Salsolarum & Atriplicum suffruticantium radices delitescentem inveni hanc speciem, praesertim Junio.

## DESCRIPTIO.

*Magnitudo* C. fulcirostris, eodemque crassior & convexior.

*Rostrum* rufescente - album, supra porco obsoleto seu detrito longitudinali nigro. *Antennae* tenues, rostro vix longiores, apice albae. *Caput* fuscum, sed ad thoracem rufo - luteum.

*Thorax* elytraque usque ad dimidium punctis verrucosis, subdetritis scabra. *Elytra* coalita, lituris albis irrorata, striis tenuissimis, postice fere tantum conspicuis. *Scutellum* nullum.

*Subtus* insectum totum, etiam pedes, colore rufescenti - albo, fugaci, punctis sparsis fuscis. *Pedes* antici robustissimi. Vid. Fig. 8.

## B 9. CVRCVLIO CENCHRVS;

Tab. B. Fig. 9.

Crassirostris dealbatus, thorace elytrisque lituris confluentibus cinereis, nigroque punctatis, rostro uniporcato.

In torridis & squalidis deserti Volgensis rarius occurrit.

## DESCRIPTIO.

Pulchritudine praecedentes aemulatur, sed multo minor etiam fulcirostri, teretior, subcylindricus.

*Rostrum* thorace fere longius, supra albatum, costa longitudinali, detrita, nigra. *Antennae*, pedes & corpus subtus candidissima.

*Thorax* fasciis 2. a dorso, 2. latioribus laterum fusco - canis, nigro - punctatis, commissura postica villis albis ciliata. *Elytra* lituris confluentibus, fusco - canis, nigro punctatis, seu potius maculis in fundo punctato candidis, sparsis. *Striae*, ob tomentum, vix conspicuae. *Puncta nigra* ubique subverrucosa, prominula. *Scutellum* nullum. Vid. Fig. 9.

## B 10. CVRCVLIO TETRAGRAMMVS;

Tab. B. Fig. 10.

Crassirostris, apterus, cinerascens, thorace fusco, lineis quatuor lacteis, elytrorum lituris quatuor nigris.

D 3

*Curculio brevirostris, thorace scabro, elytris nebulosis, punctis 2. prope apicem nigris, nitidis LEPECHIN. itin. ruff. II. app. p. 329. t. II. f. 28.*

In squalidis aridissimis deserti Volgensis maxime australis rarius inventus.

#### DESCRIPTIO.

Est e pulcherrimis & majoribus nostris, magnitudine oblique fasciati.

*Caput gryseo - luteum; rostrum thorace paulo longius, supra pallidum, medio porco prominentissimo argente carinatum.*

*Thorax pullus, punctis impressis sparsus, stria arguta a dorso, utrinque versus latera pictus lineis duabus niveis, longitudinalibus, antece divergentibus, quarum inferior postice ad elytrorum axillas transit, ubi terminatur.*

*Elytra circa abdomen connata, postice summo apice distincta, acuta; colore cinerea (seu supra nigrum quasi pruinosa), per series impresso punctata: obsoletissime notata anterius punto medii disci, & versus apicem litura forma commae, fere longitudinali, atra, hinc inde albo halone cincta.*

Reliquum corpus lutescente - album, atomis fuscis. *Pedes* albidii, antici paulo majores; femora secundi tertique paris exterius fuscō - bipunctata. Vid. Fig. 10.

#### B II. CVRCVLIO TRIBVLOIDES;

*Tab. B. Fig. II.*

*Crassirostris, thorace bicristato - scabro, elytris spinis conicis axillaribus posticisque.*

Exemplum, quon describo, ab *Amiciss. DRVRY* Londinensi, & is e Rio Ianeyro Americes, accepimus.

#### DESCRIPTIO.

*Magnitudine europaeos omnes superat, & forma crassiore Tenebriones aemulatur: habitu Curc. inderiensis.*

*Rostrum* brevissimum, subtetraëdrum, extremo incrassatum, utrinque oblique sulcatum, punctis per series piliferis, & circa os pilosum. *Labium* superius triangulare nigrum; ut & oculi. *Antennae* articulo infimo vix elongato.

*Thorax* scaberrimus, angulis prominulis subbicristatus, utrinque fascia nigra.

*Elytra* spina conica axillari, tuberculo baseos a dorso, alioque in disco, & pone medium *spina* alia conica majore, divergente, obtusiore. Liturae fuscae ad spinas axillares interius, & fascia arcuata per spinas posteriores, ad margines laterales non perducta.

*Pedes* robusti, antici majores, tibiis arcuatis, apice uncinatis. *Alae* fuscae.

*Color* supra gryeo - aureolus, subtus viridi argenteus, quo colore etiam femora ultra medium. *Abdomen* subtus postice fulvo - inauratum. Vid. Fig. 11.

## B 12. CVRCVLIO NIGRIVITTIS;

Tab. B. Fig. 12.

Brevirostris cylindraceus, dealbatus, capite thoraceque subcarinatis, fascia utrinque longitudinali fusca.

Frequens in aridis squalentibus totius deserti caspici.

### DESCRIPTIO.

E majoribus nostris, longitudine saepe ad 8." ad teretior congeneribus atque cylindraceus.

*Rostrum* thorace brevius, crassum, teretiusculum, conico - truncatum, supra cum capite album, e convexo - carinatum, *angula* longitudinali detrito nigro; idem angulus instar *friæ* argutæ in thoracem continuatus, sensim evanescens; *foveola* versus scutellum impressa.

Latera rostri nigra & ab oculis utrinque *fascia* nigra per *thoracem* album, convexum, laevissimum.

*Elytra* albata, striis tenuissimis, in quibus puncta impressa fusca.

*Albedo* totius infecti supra rubicundula; subtus flavescentes. *Abdominis* singulum segmentum puncto atro. *Femora* supra dorso concoloria. Vid. Fig. 22.

## B 13. CVRCVLIO VIBEX;

Tab. B. Fig. 13.

Brevirostris cylindraceus albissimus, striga utrinque nigra per thoracem elytraque longitudinali.

In arenosis ad Selengam plures lectus fuit, & nusquam alibi.

## DESCRIPTIO.

E minoribus, vix majoris avenae crassitie, longitudine 4<sup>111</sup>/4 cylindraceus, totus niveo - dealbatus. At latera rostri fusca, & ab oculis utrinque incipit striga lata, per thoracem elytraque longitudinalis, rectissima. *Rostrum* longitudine thoracis, teretusculum, supra stria obsoletissime impressa. *Elytra* punctato - striata, subacuta.

## B 14. CVRCVLIO GIBBER;

Tab. B. Fig. 14.

Brevirostris, totus coerulecenti - candidus, elytris nervosis, gibbere postico communi.

Cum C. tribuloide, ex eadem regione Brasiliae, adlatum, misit Amiciss. DRVRVY.

## DESCRIPTIO.

*Habitus* & proportiones C. argentati, sed magnitudo supra C. fulcirostrem.

*Rostrum* breve, tetraëdrum, supra sulco arguto aratum. *Antennae* fractae, capite duplo longiores, clava fusca. *Oculi* nigri.

*Thorax* inaequalis, a dorso obsoleto tetraëdrus. *Elytra* ventricosa, trinervia, punctisque impressis per undecim series digestis subfulcata; *axillis* acute prominula & postice gibbere communi, futurali hiulca.

Infe-

*Insectum* totum furfure laevissimo coerulecenti - candido obdutum; *pedes* simul pilis brevissimis crebris hirsuti, antici paulo majores. Vid. Fig. 14.

## B 15. CVRCVLIO CARIOSVS;

Tab. H. Fig. B 15:

Longirostris, femoribus dentatis, corpore nigro, lutefcente irrorato, thorace elytrisque maculis exesibus albis.

Inter Surinamensia Insecta mihi adlatus fuit.

## DESCRIPTIO.

*Magnitudo* supra Curc. germanum, cuius formam fere refert.

*Rostrum* teres, rectiusculum, tenue, longitudine thoracis. *Caput* circa oculos luteo pulvere coloratum.

*Thorax* lateribus luteo - irroratus, ad dorsum utrinque punctis 2. majoribus, & aliquot minoribus versus latera, exeso - albis.

*Elytra* integerrima, divisa, versus apicem gibbula, striis punctatis: punctis sparsis luteis, & paucis exeso - albis. Horum quatuor in rhombum posita, subconfluentia, versus basin exteriori margini propiora, & ad ipsum marginem quintum subgemellum, postice ad gibbum apicis unicum, quasi e tribus compositum, cordatum, --- in quolibet elytro.

*Pedes* robusti, postici majores, omnes femoribus subclavatos, subtus dente insigni notatis; *Tibiae* arcuatae. Reliqua docet *Figura* 15.

## B 16. CVRCVLIO FENESTRATVS;

Tab. H. Fig. B 16.

*Crassirostris* apterus albatus: elytrorum maculis sex rhombis fuscis.

In fabulosis ad Selengam aliquoties lecta species.

E

## DESCRIPTIO.

*Magnitudo* infra Curc. nebulosum LINN.; quoque minora eo pulchriora sunt specimina.

*Rostrum* breve, album, angulatum, supra uniporcatum. *Thorax* area dorsali, & utrinque macula posterius fuscus, punctisque nigris impressis sparsus; latere subtusque albatus.

*Elytra* connata, striis punctatis; basi subgrysea, reliquo albo-pallida, singula maculis 2. parallelogrammis, oblique parallelis, fusco-nigris fenestrata, tertia litura, versus apicem, fere longitudinali.

*Corpus* albatum, nigro-punctatum, ut & pedes. Latera pectoris & segmentorum abdominalium orae rufescentes. *Pedes*, praesertim postici, majusculi. Caeterum vide Fig. 16.

## B 17. CVRCVLIO FLAVICEPS;

Tab. B. Fig. 17.

**Crassirostris**, apterus, albatus: capite flavescente lateribus rufo, thorace elytrisque albo-lineatis, fusco interruptis.

*Curculio brevirostris* corpore cano, elytris sulcatis, nigro maculatis LEP. CHIN. itin. II. app. p. 327. tab. II. fig. 27.

In arenosis ad Selengam & Ononem non infrequens; rarius in Tatariae desertis.

## DESCRIPTIO.

Est e minoribus, citri semen aequans, *forma* circiter praecedentis, breviculus; caeterum e pulcherrimis sui generis.

*Caput* supra flavum, fronte excavata; lateribus etiam rostri rufum. *Rostrum* supra album, bisulcatum, intermedia carina arguta, longitudinali, in frontem lineola nigra excurrente.

*Thorax* a dorso lineolis sex albis (quarum mediae angustissimae) alternisque fuscis, longitudinalibus; subtus albus.

*Elytra* connata, postice subacuta, sulcata, alternis fulcorum intervallis, suturaque prominentioribus, totis albis; at harum costarum intervallis fusco quasi articulatis.

*Abdomen* album, fascia longitudinali fusca, apicem totum, praeter margines segmentorum rufos, occupante. *Pedes* albi, punctulati, postici majores. Vide Fig. 17.

## B 18. CVRCVLIO PICTVS;

Tab. H. Fig. B 18.

*Crassirostris*, albatus, thorace fasciis tribus longitudinalibus, elytrorum arcuata, fuscis.

PALL. itin. I. app. p. 463. n. 33.

In aridissimis, salmis deserti caspici & circa Lacum Inderensem, non frequens.

## DESCRIPTIO.

*Magnitudo* C. flavicipitis, sed oblongior, pulcherrimus, totus candidus, alatus.

*Rostrum* stria elevata longitudinali. *Caput* rufescens. *Thorax* fascia media latefcente, & utrinque angustiore, parallelis, fuscis.

*Elytra* obsoletissime striata, lineola punctisque quatuor ad basin notata; *fascia* medii disci lunata communis, ad futuram subinfracta, cornibus antrorsum protensa fusca. Caetera alba. Vide *Figuram* 18.

## B 19. CVRCVLIO HOLOLEVCS;

Tab. H. Fig. B 19.

*Crassirostris*, subcylindraceus: totus dealbatus immaculatus, oculis atris.

In squalidis deserti caspici, sub Atriplicibus & Salsolis, praesertim in praeruptis salinarum Tschaptchatschi lectus.

## DESCRIPTIO.

*Magnitudo & forma* subcylindracea fere ut in Curculione SCHAEFFER Ratisb. t. 123. f. 4. sed obtusior. *Elytra* etiam, ut in isto, tuber-

culo apicis acuto terminata. *Totus autem laevis est, uniformiter dealbatus*, cum tintura modo flavente, modo subrutila. *Rostrum thorace brevius*, supra stria carinata brevi. *Elytrorum puncta*, per series impressa, vix conspicua. *Pedes toti albi*, inermes; antici paulo majores.

### B 20. CVRCVLIO TENEBRIODES;

*Tab. B. Fig. 20.*

Sublongirostris, apterus, aterrimus glaber, elytris laevigatis.

? FRISCH *inf. XIII. p. 28. tab. 26.*

? SCHAEFF. *Ratib. t 62. f. II.*

In deserti caspici aridis rarius humi inter Tenebriones apteros occurrit.

#### DESCRIPTIO.

Demto rostro, facies & magnitudo Tenebr. Nomadis majoris. *Rostrum* paulo brevius, quam C. germano, crassum. *Thorax* lateribus obsolete carinato - convexus, supra ad posticum marginem foveolis tribus obsoletissimis, punctisque (ut & caput) adspersus minutissimis, fere obliteratis. *Antennae* apice, ut & plantae, fusco grysea.

*Elytra* connata, carina lateralii, uti thorax, obsoleta convexa, a dorso nervis binis obliteratis, interque nervos duplicatis seriebus *foveolarum* obsoletissimarum, quae in icone bene exprimi haud potuerunt. In singula foveola *punctum* impressum vix conspicuum.

*Corpus* totum aterrimum, fere fine nitore, durum, laevigatum. *Pedes* robusti, mutici.

### B 21. CVRCVLIO ALBATOR;

*Tab. B. Fig. 21.*

Crassirostris oblongus alatus niger, elytris nitidis punctatis, postice compressis pubescentibus, fasciis lateralibus niveis.

E Brasiliae Rio Janeiro acceptum, cum varietate, misit Amiciss. DRVRY, Londino.


## DESCRIPTIO.

Est e majoribus, sed magnitudo inconstans. *Rostrum* fere thoracis longitudine, crassum, tetraëdrum, supra bisulcatum cum stria intermedia arguta. *Antennae* tenues, fractae, flagello duplo longiore, & rostrum cum capite excedente.

*Thorax* cylindraceus, confertim punctatus, subgryseo pulveratus, *fascia* in imis lateribus utrinque longitudinali canticante, etiam per latera rostri & pectoris aliquousque continuata.

*Elytra* magna, postice compressa, dorsoque valde convexo gibba, postremo pilis fuscis pubescentia, nitide atra: series punctorum cavarum denae, seu potius fulci obsoletissimi, punctis crenati. *Fascia* in utroque latere marginalis nivea, & *alia* huic non parallela, obliquata, neque basin nec apicem adtingens, posterius tamen productior itidemque latior. In varietate minori hae duae fasciae solae adsunt. At in majori quem Fig. 21. Tab. B. expressimus, inter tertiam & quartam a futura punctorum seriem *striga* insuper nivea, longitudinalis, interrupta, posticae fasciae obliquae coadunata.

*Pectus* albo - nebulosum & abdomen fasciis duabus longitudinaliter decrescentibus, albidis. *Pedes* magni, robusti, velut polline incani, inermes, femoribus subclavatis: medii minores.

C I. *MYLARIS* GIGANTEA;

Tab. C. Fig. 1.

Maxima, picea, elytrorum fulcis profundis, laevigatis, per paria concurrentibus.

Tenebrio gigas LINN. Syst. XII. p. 674. n. 1. Amoen. acad. VI. p. 396. n. 26.

Inter Insecta Surinamensis ad me delata, neque propter novitatem, sed ad illustrandum & ornandum genus, cuius sequentes species erant describendae, in Tabulam addita.

## DESCRIPTIO.

*Magnitudo* Dytisci picei, maxima inter congeneres.

*Caput* productius & angustius, quam in Mylaride molendinaria; oculis maximis. *Antennae* depresso - moniliformes, extrorsum valde incrassatae.

*Thorax* corpore augustinior, quadratus, supra infaque aequaliter convexus, submarginatus, marginibus lateralibus argutioribus, rotundatis.

*Elytra* latiuscula, pone acuta, fulcis novem concavo - laevigatis, per paria concurrentibus. *Alae* lutescentes, venis testaceis. — *Pedes* proportione tenues, minusculi, femoribus depresso - scutulis.

*Magnitudinem* Figura 1. Tabulae C. ad amissim exprimit.

## C 2. MYLARIS GIBBOSA;

Tab. C. Fig. 2.

Subovata tota aenea, elytris gibbo - convexis, striis tenuissimis crenulatis.

Insectum, cum sequentibus duobus, ab *Amiciss. DRVR* y habeo, qui patriam Brasiliam indicavit.

## DESCRIPTIO.

*Magnitudo* Tenebrionis mortisagi, magis ovatus quam congeneres reliqui & convexior.

*Caput* convexiusculum, ad labium oris quasi incisum; *oculis* reniformibus. *Palpi* maiores duo clavati. *Antennae* vix thorace longiores, extrorsum valde incrassatae.

\*) Tenebriones alatos plerosque LINNÆI, constantibus characteribus distinctos & satis numerosos, hic & in Fauna Roffo - Asiatica, propediem edenda, proprio sub nomine *Mylaridum*, genere distincto recensui; segregato genere *Sca-* ritum, tibiis anticis fossoriis, cet. infigni, quod jam FABRICIO placuit. Nomen *Mylaridis*, — molendinariae appropriatum, male applicavit Meloïdibus FABRICIVS.

*Thorax quadratus, clypeo planiusculo, punctis impressis obsoletis sparso, marginato. Scutellum semiovatum.*

*Elytra valde gibbo - convexa, laevissima, striis novem tenuissimis, crenulato - punctatis, ad axillas tuberculo prominula. Alae magnae fuscae.*

*Pedes graciles inermes, postici vix maiores, tarpis triarticulatis, reliqui quadriarticulatis.*

*Color totius politissime aeneus, subtus & in pedibus obscure vivescens elytris fusco - aeneus. Magnitudo & forma optime in iconē Fig. 2. Tab. C.*

### C 3. *MYLARIS* SPECIOSA;

*Tab. C. Fig. 3.*

*Subovata aenea, elytris politissimis striatis, cupreo, viridique lineatis.*

*Cum praecedenti specie Brasiliana originis. Subsimilis Mylaridi aeneae quam delineauit SCHAEFFER Ratisb. tab. 51. fig. 3.*

### DESCRIPTIO.

*Magnitudo Attelabi ceramboidis LINN. (qui vera Mylaris) seu paulo supra Myl. molendinariam, eaque ovatior & convexior, tota polita, subtus aenea.*

*Caput supra planiusculum. Palpi duo maiores clavati. Antennae dupla fere longitudine thoracis, filiformes, extimis tribus articulis brevibus, crassiusculis.*

*Clypeus perfecte quadratus, planiusculus, marginatus, cum capite violaceo - aeneus, minusque reliquo politus.*

*Elytra politissima, aequaliter convexa, striis tenuissimis, subpunctatis novem, fasciis singula quatuor cupreis, interiectisque tribus virescente - aeneis, splendida. Margo inferior elytrorum chalybatus. Reliqua ut in praecedente. Vid. Fig. 3.*

C 4. *MYLARIS VIOLOACEA*;*Tab. C. Fig. 4.*

*Cylindracea splendidissima, coeruleo - violaceoque varians, addomine postice rubro, elytris punctato - striatis.*

*Brasiliana, cum duabus praecedentibus accepta.*

## DESCRIPTIO.

Longior, multoque gracilior M. molendinaria, fere cylindrica.

*Caput* subrotundum, oculis magnis reniformibus, & ante oculos nodulo prominulo supra antennas, impressione transversa frontis. *Antennae* thorace duplo longiores, vix incrassatae, filiformes.

*Thorax* cylindraceus, haud marginatus nisi postice. *Scutellum* minutum, triangulare.


*Elytra* semicylindro - convexa; striis impresso - punctatis, postice per paria concurrentibus.

*Pedes*, praesertim medii, longissimi, tarsis posticorum triarticulatis, reliquis quatuor articulorum, licet primorum brevissimi.

*Color* totius Insecti splendide violaceo sericeus, coeruleo, vel in quibusdam viridante varians. *Abdominis* segmenta tria ultima coccineoruberrima, triangulo fusco marginali utrinque ad anum. — Formam optime expressit *Fig. 4.*

## NOTA.

Hi omnes C 2 - 4. a Tenebr. chalybeo LINN. s. aeneo DEGEER. specie differunt, ex eadem licet America oriundi.

C 5. *TENEBRIO AVRITVS*;*Tab. C. Fig. 5. a. b.*

*Thorace marginato antice dilatato, elytris utrinque bicarinatis laevissimis muticis.*

*Ad Lacum Inderiensem lectus, nec alias unquam.*

DESCRI-

## DESCRIPTIO.

**T.** Mortisago vulgari major & oblongior, totus ater, ut ille, paulo<sup>ve</sup> magis nitidus.

*Caput* supra os galea usque ad oculos marginata, truncata, antice latiore; labio non distinctus. *Antennarum* articulus secundus tribus sequentibus aequalis.

*Thorax* dorso planiusculus & utrinque arguto margine, versus caput dilatato quasi alatus.

*Elytra* oblonga, apice productiuscula, a dorso planiuscula, lateribus carina utrinque argutissima, ceu acie, angulata, infra quam alia minus acuta, nec isti parallela.

*Pedes* maiores, quam in *T. mortisago*. Duo *Fig. 5. a. b.* Insetum a dorso & a latere pingunt.

C 6. TENEBRI<sup>O</sup> PTERYGODES;

*Tab. C. Fig. 6.*

*Thoracis* marginibus dilatatis affurgentibus, elytris utrinque carinatis, quadruplici serie elevato - punctatis.

*Pimelia reflexa* FABRIC. entom. p. 252. n. 9.

*Tenebrio vulgaris* FORSKAL anim. p. 79. n. 9.

Ex Oriente acceptum communicavit Celeberr. BRÜNNICHE Prof. Hafnien<sup>s</sup>.

## DESCRIPTIO.

Affimilis forma praecedenti, sed minor, *T. mortisago* aequalis, similiterque sine nitore ater.

*Caput* ante oculos galeato - marginatum. *Thorax* antice area lunata declivis, marginibus lateralibus adhuc magis, quam praecedenti, dilatatis, in laminam tenuem, lunatam, subtus transverse striatam, utrinque ad caput angulo productam, postice brevius angulatam.

*Elytra* utrinque argutissime carinata, carina posterius ferrulata; infra carinam lateribus plana; dorso planiuscula, & duobus in singulo

F

ordinibus punctorum prominulorum seu verrucularum notata; postice declivi - subacuta. *Pedes* fere robustiores, quam in *T. mortisago*. Vid. Tab. C. Fig. 6.

## N O T A.

Hicce speciebus inter se & *Tenebrioni spinoso* LINN. *mus. reg.* p. 101. admodum ad finibus, superaddo speciem quondam e Mauritania acceptam, & iisdem forma generali per quam similem, cuius, quum specimen perierit, iconem addere nequeo.

**TENEBRI didymus;** thorace late marginato postice bicorni, elytris angulatis, supra biconvexis.

**D E S C R.** *Magnitudo* fere *T. mortisagi*. *Caput* supra planiusculum, rhomboideum. *Thorax* supra planus, depresso, marginibus lateralibus dilatatis, argutissimis, sorrectis, postico angulo utrinque in spinam retrorsam terminantibus. *Elytra* ovata, cum inclusa abdomine laevia, supra fossa longitudinali futurali impressa & biconvexa, utrinque carina ferrulata, lateraliter planiuscula, pone subacuta. *Anus* spinam brevem rigidam exserit, ut in pluribus. *Femora* extremo quasi biaurita, lamellis inter quas tibiae inarticulatae. *Insectum* totum atrum, glabrum, subitus nitidius.

C 7. *TENEBRI SETOSVS;*

Tab. C. Fig. 7.

Thoracis margine scaberrimo piloso postice spinoso, elytris tricarinatis, setulis sparsis, gryseis.

Inter Insecta capensia *musei* quondam *Breyniani* inventum descripsi. Non est *Ten. hispidus* FORSKAL. *anim. p. 79. n. 8.*

## D E S C R I P T I O.

*Magnitudo* *T. mortisagi*, sed brevior & crassior. *Thorax* supra convexus, lanugine rara grysea, utrinque marginatus lamella distincta,

subtus plana supra scaberrima, pilosa, & acie fere denticulata, quae postice exit in spinam subulatam.

*Elytra* gibbo - convexa, singula nervis argute tricarinata, carina extima setis crebrioribus ciliata, intervallo nervorum punctis prominulis pilos sparsos gryseos sustinentibus. *Elytra* & *thorax* in regione scutelli *fovea* triangulari simul impressa.

*Corpus* subtus punctis sparsis prominulis, sed depilibus. *Pedes* robusti scabri, pilis brevibus hispidi; anticorum tibiae extus carinatae, spina terminali mucronata. *Vagina* ani bispinosa. Vid. Fig. 7.

### C 8. *TENEBRI<sup>O</sup>* NOMAS;

*Tab. C. Fig. 8.*

Thorace marginato, orbiculato, convexo, elytris ovatis convexis, subrugoso - laevigatis, muticis.

BARREL. icon. plant. tab. 945.

Pimelia orbiculata FABRICIUS entom. p. 253. sp. 14. GOETZE entom. p. 689. n. 15.

? Tenebrio laevis FORSKAL posth. zool. p. 78. sp. 7.

In universo deserto tatarico & in campis aridis Sibiriae australis frequens, tota aestate.

### DESCRIPTIO.

*Magnitudine* multum variat; maximi longitudine 7.<sup>III</sup> latitudine 3.<sup>III</sup> minimi longitudine 4.<sup>III</sup> latit. 1 $\frac{2}{3}$ .<sup>III</sup> Durissimus.

*Forma* fere oblongior, quam *T. mortisago*. *Caput* productius; *antennae* apice tenuiores.

*Thorax* elytris angustior, orbiculatus, antice truncatus minusque marginatus; totus convexus, commissura antica ferrugineo angustissime ciliata. *Caput* & *thorax* minus nitida, punctis minutissimis, impressis.

*Elytra* ovata, pone subacuta, valde convexa, nec quidquam carinata, nitidiuscula, subrugoso - laevigata.

Insectum subtus, pedesque, aterrimum nitidum. Variat interdum thoracis foveolis binis impressis. Alii elytris fere laevissimis. — Majorum statu ram exprimit *Figura nostra* 8.

### C 9. TENEBRI<sup>O</sup> LONGICORNIS;

*Tab. C. Fig. 9.*

Thorace marginato, postice subangustato, elytris striatis subrugosis, antennis elongatis.

? *Pimelia angustata* FABRIC. *Entom.* p. 253. sp. 13.

In deserto australi circa Volgam sub lapidibus & stercore vaccino sicco frequens vere.

#### DESCRIPTIO.

*Magnitudo* Carabi mediocris, forma fere Dermetis, sed convexior, & pedes magni.

*Caput* antice truncatum, margine supra labium, ipsoque labio ferrugineo - ciliatis. *Palpi* duo majusculi, articulo terminali triangulari clavati. *Antennae* longitudine elytrorum, filiformes, articulo terminali ovato.

*Thorax* convexus, marginatus laevis, antice posticeque truncatus & postice paulo angustatus.

*Elytra* latitudine thoracis, valde convexa, striis tenuissimis, obsoletis, interque strias impressionibus transversis obsoleto rugosa.

*Corpus* minus durum atrum opacum; subtus nitidius. *Pedes* politi, aterrimi, punctis impressis adspersi, postici majores. *Tarsi* quatuor priorum in altero sexu articulis prioribus latiusculis, omnibus subtus grysei. Vid. *Fig. 9.*

### C 10. TENEBRI<sup>O</sup> HYPOLITHVS;

*Tab. C. Fig. 10.*

Ovalis, convexus laevissimus, thorace utrinque truncato, marginato elytrorum latitudine, elytris latere carinatis.

Tenebrio nigra, tota laevis, coleoptris pone rotundatis **GEOFFR.** *parif. I.*  
*p. 351. sp. 8.*

? Tenebrio latipes **LINN.** *sysl. XII.* *p. 678. sp. 30.*

? Pimelia glabra **FABRIC.** *Entom.* *p. 253. sp. 12.*

? Histrio vafer **VOET.** *colept. I.* *t. 32. fig. V.*

Frequens ad Volgam, in arenofis aridis, sub saxis latens, vel riparum praeruptarum in fissuris; major in australioribus. In Siberia deest.

### DESCRIPTIO.

Maximorum longitudo 7.<sup>III</sup> latitudo 3 $\frac{3}{4}$ .<sup>III</sup> minores 4 $\frac{1}{2}$ .<sup>III</sup> ad 2 $\frac{3}{4}$ .<sup>III</sup>

Ater, durissimus.

*Forma* perfecte ovalis, convexitate dimidiatae glandis. *Antennae* apice tenuiores.

*Thorax* lateribus versus caput rotundatis, marginatis; postice latitudine elytrorum.

*Elytra* laevissima, carina laterali arguta, integerrima, margini thoracis continuata.

Superficies supra tota punctis minutissimis impressis sparsa, subtus nitidior, scabriuscula.

*Pedes* satis robusti; *Tibiae* anticae extremo latae, integerrimae, angulo externo obtuso, interno brevissimo, bispinoso; relinquae scaberrimae.

In minore varietate elytra obsoletissime striata, striis undulatis, thorax minus marginatus. In altero sexu tarsi primi & secundi paris articulis 2. intermediis latis, cordatis; subtus ferruginei.

Icon nostra *Fig. 10.* majorem australem varietatem imitatur.

### C II. TENEBRI<sup>O</sup> GLANDIFORMIS;

*Tab. C. Fig. II. a. b.*

Ovatus, convexo - gibbus, laevissimus, thorace lateribus subcarinato, elytris marginatis, postice rufo .. lineatis.

Tenebrio gibbus **DEGEER** *inf. tom. V.* *p. 51. t. 13. f. 8.*

Pimelia striata **FABRIC.** *Entom.* *p. 251. sp. 1.* **GOETZE** *Ent.* *p. 688. sp. 6*

F 3

Nunquam ex Indiis adlatum vidi, quam patriam adsignauit FABRICIUS; sed frequentissime adfertur inter Insecta Capensia, unde in Promontorio australi Africes vulgaris esse videtur. LINNAEVM sub *Ten. gibbi* nomine hunc vel sequentem intellexisse vix est dubium, licet synonymum *Carabi cephalotis* istum male fecerit FABRICIUS, & Europae communem perhibuerit LINNAEVS. Sed alienus ab his certe *Ten. ventricosus* SCOPOL. *carn.* 253. quem eodem inferuit GOETZE *Ent.* p. 675. n. 18.

### DESCRIPTIO.

*Mortifago major*, corpore glandem majorem aequans; totus piceo ater, nitidulus glaberrimus, durissimus.

*Caput* retusum, galea supra labium submarginata. *Palpi*, ut & antennae filiformes, vix extimo articulo crassiore.

*Thorax* laterali carina utrinque scabra; a dorso fere hemisphaericō - convexus, laevissimus; postico margine semicircularis, submarginatus.

*Elytra* laevigata, oviformi gibba, argutissima utrinque carina, secundum oram inferam planam, marginata, postice productiuscula. — In plerisque striae circiter octonae, rufo-testaceae, per totam longitudinem vel tantum postice per ambo elytra longitudinales (*Fig. II.a.*) Eaedem aliis plerumque minoribus, caeteroquin vix diversis, defunt (*Fig. II.b.*)

*Pedes* robustissimi, antici crassiores, postici longiusculi; *femora* omnium scabra, primorum saepe submuricata. *Abdomen* laevissimum.

### C 12. TENEBRI GIBBUS;

*Tab. C. Fig. 12.*

*Thorace* globoso, marginato; *elytris* ovatis marginatis, utrinque carinatis, dorso laevissimis.

Est hic a praecedenti specie evidentissime diversus, & videtur in Africa meridionali esse rarior; etenim semel omnino inter Capensia Insecta adlatum vidi.

(

## DESCRIPTIO.

Praecedente paulo minor, at in universum satis similis, eodemque colore piceo - atro, nitidulo.

*Caput* adhuc magis retusum, galeae plano perfecte verticali. *Antennarum* articuli longiores.

*Thorax* a dorso plus quam hemisphaerice gibbus, laevissimus, lateribus argute marginatus, postice truncatulus, crassiore labio marginatus.

*Elytra* globosiora & magis gibba, quam praecedentis, & praeter carinam orae inferam, ad dorsum utrinque obtusius carinata, carina scabriuscula, ad apicem non perducta.

*Pedes*, ut in antecedente; at postici minus proportione longi. *Abdominis* loricae magis politae, foveola utrinque versus marginem; quod vix in praecedente. Caeterum differentia satis e *figura* 12. cum praecedentibus collata liquet.

## C 13. TENEBRI CASPICVS;

Tab. C. Fig. 13:

Ovato - depresso - scabriusculus, thorace antice posticeque excavato, elytris utrinque carinatis, fasciis scaberrimis laevigatisque alternis.

In ripis elatioribus ad Mare caspium, praesertim in Orientali littore, non infrequens.

## DESCRIPTIO.

Mortisago duplo crassior; longitudine 11.<sup>111</sup> latitudine quoad elytra 6<sup>1</sup><sub>2</sub>.<sup>111</sup>

*Caput* crassum, ante oculos marginatum. *Thorax* marginatus, elytris multo angustior, ad caput utrinque angulo productus, antice valde excavatus, postice leviter, punctis muricatis ad margines crebris & prominentioribus scaber.

*Elytra* postice declivi - productiuscula, dorso lata, planiuscula, utrinque carina biangulata, scabra, ad axillas angulo prominula; supra

fasciae quatuor longitudinales & triangulum in regione scutellari, punctis muricatis piliferis obsita, quibus interjecti tractus laevigati.

*Pedes piloso - hispido. Thorax subtus mucrone sternali plano rotundato, fere ut in Elateribus, sed horizontali, nullaque fossa pectoris respondentem. Color totius aterrimus, nitidus. Reliqua loquitur Fig. 13.*

### C 14. *TENEBRI MVRICATVS;*

*Tab. C. Fig. 14.*

Elytris carinatis, undique muricatis, punctis feriatis conicis piliferis; tarsis hispidis.

PETIVER. *gazophyl. t. 92. fig. 14.*

*Tenebrio muricatus LINN. syst. XII. p. 676. sp. 17. GOETZE Entom. I. p. 674. n. 17.*

*Pimelia muricata FABRIC. Entom. p. 251. sp. 4. (excluso GEOFFRAEI synonymo.)*

Frequens in deserto arenoso Naryn, inter Volgam & Iaicum, in collibus Elymo arenario & Pterococco polygonoide obsitis, sed alibi nunquam observatus. Femorum posticorum adtritu ad elytra stridet, & saepe moribundus Gordios albos ano excernit.

### DESCRIPTIO.

Mortifago major & crassior, sed minus latus antecedente, totus ater, minus durus, minusque nitidus.

*Caput majuscum, convexum, ante oculos suprave antennas marginatum. Antennae subpilosae, articulo ultimo minimo, conico, ferrugineo.*

*Thorax tantum antice excavatus, supra gibbus, muricato scaberimus, utrinque stria arguta marginatus; ubi ad caput angulo acutissimo prominet, non tamen omnibus.*

*Elytra utrinque secundum oram subtus stria laevi carinata, caeterum tota muricata tuberculis acutissimis, piliferis retrorsum subuncinatis, per quatuordecim series digestis, quarum a lateribus secunda & ipsa subcarinata.*

Subtus

Subtus corpus tenerrime canescit. Thoracis commissurae subtiliter ciliatae.

Tibiae anticae latae, exterius crenulatae, apice interius bispinosa. Tarsi anteriores nudi, reliqui pilis nigris hispidissimi. Sexus differentia nulli, nisi forte quod thorax ad caput utrinque magis vel minus angulatus.

Caeterum inspice Fig. 14. cuius magnitudinem omnes facile aequaliter aequaliter.

#### N O T A.

Videtur hoc quoque referri posse: *Tenebrio spinosus* FORSKAL. *posth. zool. p. 80. n. 13.* Sed summa affinum specierum similitudo non dat sperare absolutam *Tenebrionum* synonymiam, donec pleraeque calidarium regionum species iconibus illustratae fuerint.

#### C 15. *TENEBRI* CEPHALOTES;

*Tab. C. Fig 15.*

Thoracis margine antico posticoque ciliato, elytris scaberrimis, quadrinerviis, lateralibus carinatis subserratis.

? *Tenebrio grossus* LINN. *Syst. XII. p. 676. sp. 16.* GOETZE *Entom. I.* p. 674. n. 16.

In desertis aridissimis salmis ad Iaikum australem, maxime circa Indienensem lacum salsum, non infrequens. Licet simillimus infra C 22. describendo, attamen essentialibus notis & formae momentis distinctissimus.

#### DESCRIPTIO.

Praecedente brevior & plerumque minor; nonnulli tamen subaequant.

*Caput* majus quam reliquis speciebus, subangulatum ante oculos marginatum supra antennas; *labio* supra os distincto productiore. *Antennae* pilosae, extrorum crassiores, articulo terminali minimo, conico, ferrugineo.

G

*Thorax* convexus, lateribus scabris anterius angulatis, antico posticoque margine truncatis ferrugineo ciliatis.

*Elytra* tota punctis imbricatis scaberrima, nervis singula quatuor scabratissimis, quorum duo dorsales obsoleti, laterales subcarinati, punctisque prominentissimis piliferis subferrati.

*Pedes* scabri, tibiis angulatis hispidis; *tibiae* anticae apice latae, biangulatae, interius bispinosae; *Tarsi* vix pilosi.

*Pectus* vix manifesto tomento canescens; caeterum totus aterrimus, nitidiusculus.

*Figura 15.* majores hujus speciei refert; observavi autem, in australibus ad Volgam, varietatem *T. mortisago* vulgari haud crassiore, punctis muricatis elytrorum obsoletioribus, nervis obsoletissimis, vixque extimo subcarinato, ciliis thoracis pallidis.

### C 16. *TENEBRIOS VBGLOBOSVS;*

*Tab. C. Fig. 16. a. b.*

Subglobosus, elytris toruloso - laevigatis; nervis subquaternis, extimis carinatis, crenulatis.

*Tenebrio atra*, aptera, rotundata, elytris fulcis tribus elevatis. **GEOFFR. paris. I. p. 352.**

*Tenebrio variabilis LINN. syt. XII. p. 678. sp. 28. GOETZE entom. I. p. 677. sp. 28.*

? *Pimelia rugosa FABRIC. entom. p. 252. sp. 7. GOETZE entom. I. p. 688. sp. 10.*

In limosis, torridis deserti tatarici australioris, a Tanaï usque ultra Iaïcum haec species, praesertim circa vias, e vulgarissimis est infestis Majo & praesertim Iunio; omnium copiosissima circa Volgam. Lente, ut congeneres reliqui, incedit, interdiu fere immobilis. Infestatur crebro Gordiis tenuissimis albis, qui, moriente infecto, plerumque singuli per anum erumpunt.

## DESCRIPTIO.

Multo brevior & globosior praecedentibus, mole nucis avellanae mediocris; totus piceo niger & minus nitidus, plerumque limo inquinatus. Minus durus quam plerique congenerum.

*Caput* convexum. *Thorax* brevissimus, & corpore multo angustior, convexo - teretiusculus, laevis, antice posticeque truncatus, lateribus vix linea marginatus.

*Elytra*, cum corpore, ovato - subglobosa, obsita verruculis f. torulis obsoletis, magis minusve laevigatis, exarataque nervis a dorso in quolibet binis, plerumque obsoletissimis, binisque utrinque lateralibus carinatis, crenulatis; infra quos ora elytrorum inflexa plana, laevis.

*Pedes* scaberrimi, mediocres, tibiis hispidulis.

*Figura nostra* 16. a. ex dorso; b. a latere ad veram & solitam magnitudinem delineata est. — *Variat* species elytris saepe fere laevigatis, & interdum, quum valde scabra sunt, impressione per futuram longitudinali subdidymis.

## NOTA.

LINNAEVS citatam speciem non satis determinatam praestitit, unde dubium synonymon moneo.

## C 17. TENEBRIOS TORVLOSVS;

Tab. C. Fig. 17.

Ovato - subglobosus, elytris tuberculatis undique convexis, enerviis.

Inter insecta capensia, simul cum *Ten. setoso* C. 7. ad me delatus; videturque in Promontorio Africes inter rariores esse species.

## DESCRIPTIO.

*Magnitudine* & forma proxime ad praecedentem accedit, circumcaesura totius corporis, cum thorace & capite, fere oviformi.

*Caput* tantum versus os marginatum, supra planum. *Thorax* laevis, brevissimus, lateraliter linea submarginatus.

*Elytra* dorso convexo - gibba, lateribus carina rotundata, infraque eandem tuberculis minimis confertis inaequalia; supra torulis majoribus, per series utrinque sex digestis, in regione scutelli laevigato-  
obsoletis.

*Pedes* robustiores, quam in antecedente. *Color* totius similiter piceus, parum nitidus. Vid. Fig. 17.

#### OBSERVATIO.

Pro complendo Tenebrionum genere addam descriptionem speciei praecedentibus affinis & sequentibus, quam e Mauritania quondam accepi, cuius vero specimen, nondum delineatum, inter alia perii:

TENEBRI<sup>O</sup> (*chrysomeloides*) ovatus scaberrimus, thorace longitudinaliter rugoso, elytrorum porcis tribus verrucosis.

In surfuribus e Mauritania in nave casu adlatis repertus fuit Amstelaedami.

DESCR. *Moles* fere glandis, circumcaesura Chrysomelae tenebricofae FABR. (FRISCH. inf. XIII. t. 22.) Totus ater, parum nitidus, inter scabritiem sordidus. *Thorax* cavis punctis sparsus, marginibus lateralibus crassis; supra planiusculus, lunula utrinque transversa, impressa notatus. *Elytra* connata, supra valde convexa, seriebus tribus punctorum prominentium, inter easque rugoso - scabra, utrinque ad dorsum lateribus carinata, acie serrulata. Lateraliter elytra planiora, punctato - scabra; pone obtusa. *Abdomen* *vaginam* corneam exferens. *Pedum* femora punctata, at tibiae scabrae: anticae, in altero maxime sexu, extimo extorsum in angulum productae. *Antennae* mediocres, articulis 2. extimis crassioribus, terminali sublenticulari.

#### C 18. TENEBRI<sup>O</sup> COSTAT<sup>V</sup>S;

Tab. C. Fig. 18.

Subglobosus glabriusculus opacus, elytris singulis costis tribus crenulatis, extima carinata.

In torridis deserti caspici inter Volgam & Iaïkum, imprimis circa salinas Tschaptchatschi & lacum Inderensem lectus, sed est e rarioribus insectis.

### DESCRIPTIO.

*Forma* globoſo - ovata fere Ten. globosi, ſed depreſſior, paulo-que minor & durior; colore atro, opaco, ſine nitore.

*Caput* squamula, ſupra antennarum ortum, ſubauritum. *Anten-nae* breves, extrorſum paulo cratiiores.

*Thorax* breviflumus, non multo latior capite, adeoque corpore multo anguſtior, convexus, punc̄tis ſcaberrimus, antica & poſtica ora marginatus, ad latera vix linea prominula.

*Elytra* ſingula costis tribus argutis, crenato denticulatis (extima ſubcarinata); quarum intervalla plana, punc̄tis minutiffimis, piliferis ſparsa. *Pedes* proportione, ut in Ten. globoſo; poſtici longiores.

Differentias formae a ſequenti ſpecie, proxime affini, optime il-luſrat Icon Fig. 18.

### C 19. TENEBRI<sub>O</sub> PVBESEN<sub>S</sub>;

Tab. C. Fig. 19.

Ovatus, lanuginosus, opacus, elytris ſingulis costis qua-tuor denticulatis.

? *Tenebrio angulatus* LINN. muſ. regin. p.99. Syſt. nat. XII. p.677. Sp. 22.

? V O E T. coleopt. I. tab. 39. fig. 52. (Forma convenient).

In iisdem, cum praecedente, regionibus, nec frequentiorem, ob-fervavi.

### DESCRIPTIO.

Oblongior & magis ovatus, praecedente; ſupra aterrimus, opa-cus, totus, etiam elytris nigro - piloſiſſimus, pilo tenero lanugineo; ſubtus minus piloſus & obſoletius niger.

*Antennae* longiores, quam in praecedente, piloſae, filiformes. *Squamulae* nullae prominulae ad caput.

G 3

*Thorax* major, cylindricus & minus convexus, quam prioris, punctis prominulis crebris scaberrimus.

*Elytra* porcata costis (singula) quaternis, valde prominulis, crassiusculis, muricato - scabris, pilosissimis, & inter costas punctis sparsis, piliferis scabrata.

*Pedes* longiores, quam in praecedente; antici robustiores. Reliquas differentias comparativas ob oculos ponit Fig. 19.

### C 20. TENEBRI<sup>O</sup> LEVCOGRAPHVS;

Tab. C. Fig. 20:

Ovatus, thorace scaberrimo, difformi, elytris carinatis scabris, fasciis longitudinalibus albatis, laevibus.

Tenebrio leucogrammus PALL. itin. II. append. p. 719. n. 43. GOETZE entom. I. p. 684. sp. 4.

In arenosis & limosis ad Irtis fluvium, supra Iamyscheva, frequentissimus Iunio; rarissime contra ad Iaicum & Volgam, itemque ad Selengam observatus fuit.

#### DESCRIPTIO.

*Magnitudo* & *forma* fere Ten. pubescens; a dorso minus convexus.

*Caput* majus, vertice foveolis aliquot impresso. *Antennae* filiformes.

*Thorax* muricato - scaberrimus, compressionibus duabus posticis difformis, dorsoque planiusculus.

*Elytra* nitidiuscula, exterius obtuse carinata, punctis acutis adspersa: fasciis laevigatis longitudinalibus utrinque a latere binis per totam longitudinem cano - albis, & a dorso tribus in singulo insignioribus, plerumque vix ad  $\frac{1}{3}$  longitudinis albatis, versus basin sensim evanescientibus. In aliis tamen hae ultra dimidium, & in majoribus speciminibus (rarioribus), quale *Figura* 20. nostra exprimit, fasciae per totam dorsi longitudinem albatae, tomento vix manifesto.

*Abdomen* subtus canescit. *Pedes* proportione praecedentis; antici robustiores, tibiis exteriore margine denticulatis.

C 21. *TENEBRIOS SPINIMANVS;**Tab. C. Fig. 23.*

Thorace marginato laevi, elytris laevissimis postice obtusis, tibiis primoribus spina robustissima, arcuata productis.

In australibus Ruffiae circa Borysthenem a Cel. LAXMANN lectus, mecumque amice communicatus fuit. — An Ten. gigas 14. LINNAEI? non satis determinatus.

## DESCRIPTIO.

*Magnitudo* Ten. mortifagi, sed crassior & convexior, caeterum forma subfamilis.

*Caput* planum, laeve. *Antennae* longitudine thoracis, crassiusculae, moniliformes, extrorsum articulis octonis sublenticularibus, crassioribus.

*Thorax* convexus, laevis, antice posticeque truncatus, marginibus lateralibus fere semicircularibus.

*Elytra* thorace latiora, laevissima, valde & aequaliter convexa, ut fere formam glandis referant, postice obtuso apice productiuscula. Lente inspecta instar corii cicatriculis, punctisve obsolete & levissime rugoso - scabra apparent.

*Pedes* robusti, breviores, quam in *T. mortifago*; *tibiae* anticae ultra tarbos productae in spinam extrorsum inflexam, aequali fere *tibiae* crassitie pergentem. Reliquae *tibiae* apice, solito more, bispinosae.

*Corpus* totum aterrimum, nitidum, glaberrimum, durum. Conf. *Fig. 23.*

C 22. *TENEBRIOS ASPERRIMVS;**Tab. H. Fig. C. 22.*

Thorace convexo laevi, submarginato; elytris punctis muricatis inaequalibus, latere bicarinatis ferrulatis.

*Pimelia angulata* FABRIC. *entom.* p. 252. *sp. 6.*

*Tenebrio spinosus* FORSKAL *poth. zool.* p. 80. n. 13.

Ex Oriente acceptum communicavit Celeb. & Amiciss. BRÜNNICHE.

### DESCRIPTIO.

Ita facie similis Ten. cephaloti C. 15. ut nisi coram collatis speciminiibus & iconismis, haud facile distingui possit. *Colore* aterrimo nitido & magnitudine similis est.

*Caput* minus grande, nec angulatum, ore minus producto. *Thorax* brevior & angustior, valde convexus, commissuris haud ciliatis, linea laterali arcuata multum infra dimidium posita.

*Elytra* paulo magis ovata, magisque muricata, punctis acutissime prominulis, subspinescentibus, quorum majores per duo in singulo series dorsales & carinas utrinque duas laterales parallelas (quasi ferrulatas) dispositae, quibus singulis interjectae series ternae vel quaternae punctorum minorum, minusque prominentium. Pars elytrorum lateralis, infra carinas, plana, punctis minutis ordinatis scabra.

*Antennae* subpilosae; reliquum corpus glaberrimum. *Pedes* minus robusti, quam in Cephalote, & praesertim antici 4. minores. Reliqua patent e *Figura* C 23. priori C 15. collata.

### C 23. TENEBRI~~O~~ LATICOLLIS;

Tab. H. Fig. C. 21.

Ovalis, depresso, aterrimus, laevissimus, thorace marginato, latissimo, antice excavato, postice truncato elytris substriatis.

Nuper inter Insecta Capensia, a Viro spectatissimo & amicissimo DN. Guil. van der MEVLEN, Amstelaedamo missa, accepi ad finem hanc Ten. hypolitho nostro, sed rite distinctam tamen speciem, quae non est Ten. tibialis LINN.

### DESCRIPTIO.

*Magnitudine* aequat staturam maximam T. hypolithi, sed multo depresso, proportione fere Carabi.

*Caput*

*Caput galea os tegente subsemicirculari. Antennae exiles, thorace fere breviores, moniliformes, incrassatae, articulo terminali globoso, ferrugineo. Palpi subclavati.*

*Thorax magnus, latissimus, laequaliter convexus, laevissimus; antice pro capite excavatus, postice margine rectilineo elytris contiguo; oris lateralibus, valde marginatis, in segmento circuli comprehensis.*

*Elytra thorace angustiora, laevigata, striis denis tenuissimis, subpunctatis.*

*Pedes robustissimi, laeves, postici majores; tibiae extremo incrassatae ancipites, anticae interiore acie crena incisae.*

Insectum totum aterrimum, nitidiusculum, glaberrimum. Vid.  
Fig. C. 21.

### C 24. TENEBRIOSILPHOIDES;

Tab. H. Fig. C. 24.

Oblongiusculus, depresso-punctato-scaber, thorace late marginato, elytris trinerviis, duplo-canaliculatis.

Tenebrio silphoides LINN. syl. XII. p. 677. sp. 26.

Cum praecedente, Promontorio Bonae spei, per Amic. Dn. G. VAN DER MEVLEN accepi; LINNAEVS e Mauritania habuit.

### DESCRIPTIO.

*Magnitudo et facies Silphae fabulosae; color totius ater, sine nitore, nisi quem punctorum intervalla habent, subholosericeum.*

*Caput orbiculatum, impressione arcuata transversa, portionem galeae ori vicinam distinguente. Antennae longiusculae, extrorsum crassiores, moniliformes. Palpi articulo terminali truncato clavati.*

*Thorax marginibus lateralibus planis, subadspersus dilatatus, antice pro capite excisus, postico margine rectilineus, ab elytris intercalo distans. Superficies tota thoracis, ut et capitidis abdominisque punctis cavis confertis scabra.*

*Elytra* basi truncata, nervis in singulo tribus prominentibus, laevigatis (praeter suturam et marginem) porcata, quorum medius, intra duos reliquos versus apicem concurrentes, terminatur. Intervalla, inter nervos, suturam, et marginem, singula serie duplii punctorum excavatorum crenata.

*Pedes* postici multo maiores, omnes tarsis piceis, subtus ferrugineis; tibiis teretibus, ferrugineo pilosis, posticorum interius subbarbatis. Conferatur caeterum Fig. C. 24.

### C 25. TENEBRI~~O~~ BVPRESTOIDES;

Tab. H. Fig. C. 25.

Oblongus, laevissimus, thorace lato marginato, tibiis anticus latis crenulatis.

Tenebrio buprestoides PALL. itin. II. app. p. 719. n. 44. GOETZE entom. I. p. 684. n. 3.

In collibus arenariis desertorum australium; praesertim frequenter et paulo major ad Irtin in fabuletorum tumulis circa Astragalum Ammodyten collectis. Similem, sed vix Derm. Iardario majorem, in Dunis maritimis Belgii quondam observavi.

### DESCRIPTIO.

*Magnitudo* paulo supra Silpham fabulosam, quam figura paene refert; sed convexior et aterrimus, nitidiusculus, laevis. Subtus magis politus.

*Caput* latum, retusum, oculis suggrundio cinctis, supra infraque prominulis. *Antennae* extrosum paulo crassiores.

*Thorax* brevis, corpore paulo latior, clypeo antice pro capite exciso; lateribus intra segmentum circuli terminatis, marginatis, argutissimis; postice rectilineus, elytris contiguus. Commissurae thoracis tenuerrime fimbriatae. *Scutellum* conspicuum, transversum, quod vix in alia specie.

*Elytra* marginata acie dupli, exteriore pilis subciliata, caeterum laevia, punctis vix manifestis in 9 strias digestis, et subtilissimis sparsis per totam superficiem, etiam clypei.

*Pedes* hispiduli; *Tibiae* antice latiusculae, margine subdenticulatae.

### C 26. *TENEBRI~~O~~ NOTOCEROS*;

*Tab. C. Fig. 26. a. b.*

Oblongus, albo - variegatus: thorace utrinque dentato, tubere supra caput; elytris postice gibbo utrinque conico.

*Sepidium cristatum* FABRIC. entom. p. 250. sp. 2. GOETZE entom. I. p. 688. sp. 5.

Ex Oriente acceptam communicavit Cel. et Amiciss. BRÜNNICHE, curiosissimam hancce speciem, quam, cum Tenebrione alexandrino *Forskalei* (posth. zool. p. 80. n. 12.) conjunctim, peculiari nomine generico dotavit FABRICIVS.

### DESCRIPTIO.

Inter Tenebriones abnormi habitu species, forma generali convenit cum Attelabo Monocerote LINN. cum quo Tenebrionum affinitatem nectere videtur.

*Caput* majuscum, crassum, depresso, fronte excavata; furfure albatum, solo vertice nigro - variegato (ubi albedo derafa); et oculis testaceis, reniformibus. *Antennae* crassae, depresso, thorace duplo longiores, filiformes, albatae. *Labium* emarginatum canescens; *Maxillae* exterius planae; *Palpi* duo majusculi totidemque minuti, subtus e sinu oris prominuli.

*Thorax* (niger, albo - variegatus, subtus albus), utrinque spina plena, decurrente cruciatus, supra carinatus; antice supra caput auctus tubere tomentoso - albo, obtuso, subdidymo, lateribus nigro - impresso.

*Elytra* connata, compresso - ventricosa, albata, nigro - varia, singula carinis duabus prominentissimis, argutis, porcata, quarum exterior postice in prominentiam conicam, triquetram exit. Intervalla por-

corum rugoso - cavernosa, ut et spatium futurale; at pars lateralis elytrorum planiuscula, magis aequalis, tota alba, nervis 2 prominulis laevigato - atris.

*Corpus subtus* tomento albatum; abdominis loricae singulae utrinque macula derafa nigra. *Pedes* proceri, teretes, inermes, toti albo obducti; postici multo maiores, tarsis tri - reliqui quadri - articulatis.

Formam anomalam insuper illustrabit icon *Fig. C. 26. a.* dorsalis, *b.* a latere delineata.

### OBSERVATIO

*circa Tenebriones generatim.*


*Tenebrionum* species plures, quam quisquam Entomologorum ex autopsia recensuit, in propria collectione servans, quotquot potui iconibus illustrandas esse putavi, ut genus hoc numerosissimum tandem certioribus speciebus innotesceret. Sed defunct mihi multae africanae et orientales, (in America enim, licet *Mylaridum feracissima*, veros dari *Tenebriones* nondum constat), apud autores hucusque indicatae, at nullis pleraeque iconibus illustratae, quas hic recensendas esse credidi, ut alii fensis icones suggerant, sine quibus species hujus generis nunquam rite constabunt, quippe multae inter se simillimae a nostris omnibus evidenter distinctae, sequentes fere sunt, exclusis nempe *Mylaridum* speciebus, et quas a *Tenebrionibus LINNAEI*, nomine *Scaritum*, recte segregavit FABRICIUS:

1. **TENEBRI<sup>O</sup>** mortisagus LINN. satis notus, optime delineatus a FRISCHIO (*inf. XII. t. 25.*)
2. **TENEBRI<sup>O</sup>** gages LINN. *syst. XII. p. 676. sp. 14.* Blaps gigas FABRIC. *ent. p. 254. sp. 1. GOETZE entom. I. p. 673. sp. 14.*
3. **TENEBRI<sup>O</sup>** grossus LINN. *syst. XII. p. 676. sp. 16. GOETZE entom. I. p. 674. sp. 16.*
4. **TENEBRI<sup>O</sup>** polychrestus FORSKAL. *posth. zool. p. 79. sp. 10. GOETZE entom. I. p. 685. sp. 9.* Blaps sulcata FABRIC. *entom. p. 254. sp. 2.*
5. **TENEBRI<sup>O</sup>** madraspatanus. PETIV. *gazoph. tab. 92. fig. 14.* Blaps excavata FABRIC. *ent. p. 254. sp. 4. GOETZE entom. I. p. 690. sp. 18.*

6. TENEBRI<sup>O</sup> spinosus LINN. *muf. reg.* p. 101. *Syst. XII.* p. 677. *sp. 24.*  
*GOETZE entom. I.* p. 676. *sp. 24.* Pimelia spinosa FABRIC. *ent.* p. 252.  
*sp. 8.*
7. TENEBRI<sup>O</sup> carinatus. Pimelia carinata FABRIC. *ent.* p. 252. *sp. 10.*
8. TENEBRI<sup>O</sup> collaris. LINN. *Syst. XII.* p. 677. *sp. 21.* GOETZE *ent. I.*  
*p. 675. sp. 21.* Pimelia collaris FABRIC. *ent.* p. 252. *sp. 11.*
9. TENEBRI<sup>O</sup> longipes. FABRIC. *entom.* p. 251. *sp. 3.* An Tenebrio co-thurnatus FORSKAL. *posth. zool.* p. 80. *sp. II.* — Conf. *Voet. coleopt. I.*  
*tab. 39. fig. 51.*
10. TENEBRI<sup>O</sup> hispidus FORSKAL. *posth. zool.* p. 79. *sp. 8.* Pimelia hispida FABRIC. *ent.* p. 251. *sp. 2.*
11. TENEBRI<sup>O</sup> rugosus LINN. *Syst. XII.* p. 678. *sp. 27.* GOETZE *ent. I.*  
*p. 677. sp. 27.*
12. TENEBRI<sup>O</sup> laevigatus LINN. *Syst. XII.* p. 678. *sp. 29.* GOETZE *ent. I.*  
*p. 677. sp. 29.*
13. TENEBRI<sup>O</sup> tibialis LINN. *Syst. XII.* p. 678. *sp. 31.* GOETZE *entom. I.*  
*p. 678. sp. 31.* An Erodius planus FABRIC. *entom.* p. 259. *sp. 2.*
14. TENEBRI<sup>O</sup> coeruleus LINN. *muf. regin.* p. 98. *Syst. XII.* p. 677. *sp. 19.*  
*PETIV. gaz. tab. 22. fig. 6.* GOETZE *entom. I.* p. 675. *sp. 19.* Helops coeruleus FABRIC. *entom.* p. 257. *sp. I.* Forte ad Mylarides referenda species.
15. TENEBRI<sup>O</sup> striatulus LINN. *Syst. XII.* p. 679. *sp. 33.* GOETZE *entom. I.* p. 78.
16. TENEBRI<sup>O</sup> alexandrinus FORSKAL. *posth. zool.* p. 80. *sp. 12.* Sepidium tricuspidatum FABRIC. *entom.* p. 250. *sp. I.* GOETZE *entom. I.* p. 686.  
*sp. II.* et p. 687. *sp. 4.*
17. TENEBRI<sup>O</sup> uncipes FORSTER. *nov. spec. Cent. I.* p. 60.
18. TENEBRI<sup>O</sup> setipes. SEBA *thes. IV.* *tab. 82.* *fig. 15.* e maximis, Ten-  
*muricato subsimilis, clytris porcatis et hispidis, tibiis longo mucrone setaceo*  
*ad tarsos elongatis. Iterata icone et descriptione merito illustrandus.*
19. TENEBRI<sup>O</sup> Erodius. Erodius gibbus FABRIC. *entom.* p. 258. *sp. I.*  
*GOETZE entom. I.* p. 691. *sp. 30.*
20. TENEBRI<sup>O</sup> femoralis LINN. *Syst. XII.* p. 679. *sp. 32.* GOETZE *entom. I.* p. 678. *sp. 32.* In Germaniae arenosis non infrequens; similis hypo-  
*litho, sed minor, latiusculo thorace et pedibus posticis magnis distinctus.*

21. TENEBRIO gallicus. Ten. atra, aptera, coleoptris rugosis, pone acuminatis GEOFFR. par. I. p. 347. sp. 2. tab. 6. fig. 6. Forte Ten. hypolithi nostri varietas major, striis undulatis evidentioribus; forma caeterum similissimus.

Relinquo alias species nonnullas GEOFFROI et FABRICII, de quibus non satis constat, an vere ad Tenebriones nostros referri debant.



### D I. BVPRESTIS CHRYSITES;

Tab. D. Fig. 1.

*Crassa*, aureo viridissima, elytris apice ferratis, rubris, basi inaequalibus, sterno antrorsum producto, conico.

Buprestis sternicornis varietas LINN. syst. XII. p. 660. sp. 5.

Buprestis mucronata DE GEER inf. IV. p. 136. tab. 17. fig. 25.

Buprestis Chrysis FABRIC. entom. p. 218. sp. 13. GOETZE ent. I. p. 586. 5b.

Scarabaeus novus (inepte) SCHROETER Abhandl. zur Naturg. I. p. 335. tab. 2. fig. 3. GOETZE ent. I. p. 595. sp. 2.

Inter Insecta in littore cis-gangetico Indiae lecta non infrequenter adfertur, et sine dubio differt specie a Bupr. sternicorni LINN. itidem Indiae inquilina, sed quae plerumque ex Americae calidis adfertur, interque Iamaicensia Insecta apud SLOANEVM (Iam. II. p. 210, tab. 236. fig. 8.) recensita est.

### DESCRIPTIO.

Scarabaeo Fullone major, multoque crassior Bupr. gigantea; e crassissimis et splendidissimis totius generis.

*Caput* inflexum, viridi-auratum, supra os marginatum, vertice punctis cavis sparsum. *Maxillae* piceae. *Antennae* longitudine thoracis, nigrae, articulis 4. insimilis simplicibus, reliquis 7. serrato-pectinatis, terminali subemarginato.

*Thorax* convexo - gibbus, lateribus haud marginatus, aureo - viridissimus; undique punctis excavatis magnis, crebris sparsus; margine scutellari in angulum coactus, ipso scutello deficiente.

*Elytra* valde convexa, politissima sanguineo - rubra, basi exterius dilatata, versus apicem aliquoties subserrata, tota punctis minutissimis impressis obsita, foveolis versus basin, praesertim in regione scutellari, obsoletissimis inacqualia.

*Pedes* testaceo rubri, tarsis longissimis imbricatis.

*Subtus* corpus totum splendidissime viridi - aureum, sternum inter pedes secundi paris antrorum mucrone conico, descentente, acutissimo, apice nigro productum; quod Ill. DE GEER figuris expressum est. Veram et praestantiorum magnitudinem et a dorso inspecti infecti circumscriptiōnē exprimit nostra Tab. D. fig. 1.

## D 2. BVPRESTIS VARIOLARIS;

*Tab. D. Fig. 2.*

*Crassa*, aenea, pubescenti - scabra, elytrorum maculis impressis tomentosis, sterno mutico.

*Scarabaeus Aleensis pilosus viridis*, lineis albicantibus punctatis PETIVER  
*gazoph. tab. 13. fig. 5.*

*Buprestis variolaris* PALL. *itin. I. app. p. 464. n. 37. GOETZE entom. I. p. 599. n. 14.*

In australibus ad Volgam et Iaicum, locis montosis Iunio mense observatur, frequentans Echinopem et Onopordum. Quod olim dixi, (*Itinerar. l. c.*) me eandem speciem ex India et Africa vidisse, corrigendum est, fallax enim memoria suggestit speciem capensem similem, sed tamen (ut nunc video) diversam, et cum Bupr. fasciculata forte conjugendam.

### DESCRIPTIO.

Est e speciebus maximis, Melolontha saepe major; longitudine 1." 1./// latitudine 6./// crassitie 4 $\frac{2}{3}$ ./// *Forma* tota simillima Bupresti fasciculatae, crassa, cylindraceo - oblonga.

*Caput* minusculum, inflexum, pubescens. *Antennae* tenues, filiformes.

*Thorax* gibbus, postice angulo scutellari notatus per medium impressus, et ruga longitudinali arguta carinatus, totus pubescenti - tomentosus, scaberrimus.

*Elytra* obtusa, valde convexa, punctis cicatricibusque crebris scabrata, areolis orbicularibus impressis, inauratis, flavo-tomentosis, per quinque series digestis; e quibus una ad medium basin major, et oblonga in regione scutelli.

*Pedes* longiusculi, postici paulo minores; omnes tarsis elongatis.

*Corpus* subtus nitidius, totumque Insectum aeneo - inauratum, ex albido flaventi lanugine, subtus laxiore. Variat colore cupreo vel chalybato. Vide caeterum Fig. 2.

### D 3. BVPRESTIS TATARICA:

Tab. D. Fig. 3. a. b.

*Crassa*, ovata aenea, elytris integris canaliculatis, fulcis tomentosis subobliquis.

Buprestis tatarica PALL. itin. I. app. p. 464. n. 38. GORTZ E entom. I. p. 599. n. 15.

Nullibi praeterquam ad Lacum Inderensem, ubi frequentissima in muria perit et ad oram lacus egeritur, vivaque passim in maxime australibus ad Iaicum observata fuit.

### DESCRIPTIO.

Omnium brevissima, ovata, magnitudine Scarab. hirtelli, vel ultra. Longit. majoribus  $7\frac{1}{2}.\text{III}$  latitudo  $4.\text{III}$  crassities  $2\frac{1}{2}.\text{III}$

*Caput* subrotundum, secundum oculos canescens. *Antennae* thorace breviores, extrorsum paulo crassiores.

*Clypeus* convexus, lateribus gibbus, impressione ad scutellum; caeterum punctis vix conspicuis.

*Elytra*

*Elytra* laevia, striis longitudinalibus subtilissimis, exterius canaliculata sulcis latis, planis, cano - tomentosis; quorum *unus* exteriori margini parallelus, *alter* obliquior, in omnibus adsunt. *Posterior* hic aliis geminatus, et *accessorius* adhuc dorsalis, unde tunc elytra tota canaliculata.

*Color* aeneus obsoletior; tomento passim pallido, tenuissimo. *Fig. 3 a.* varietatem sulcis paucioribus, *3 b.* pluribus, exprimit.

#### D 4. *BVPRESTIS CANALICVLATA;*

*Tab. D. Fig. 4.*

Oblonga, crassiuscula, fusco - aenea; thorace elytrisque utrinque fascia impressa alba canaliculatis.

Frequentissimum Insectum circa Selengam et in Dauuria, rarius circa Ieniseam et Irtin lectum; ubique flores frequentat. — Convenit proxime cum Bupr. linearis LINN. *Syst. XII. p. 663. sp. 28. DEGEER IV. p. 137. tab. 17. fig. 26.*

#### DESCRIPTIO.

Oblongior et angustior *Bupr. rustica*, maxime postice angustata, elytris tamen apice obtulis. *Corpus* crassiusculum. *Scutellum* transversim oblongum. *Thorax* laevis, postice angulo scutellari, fulco medio et utrinque lata impressione longitudinali, per *elytra* continuata eorumque margini parallela, quae vel virescente aerugine, vel albido - irrorata est. *Nervi* 2. prominuli obsoletiores in singulo elytro et in quibusdam *sulcissimis* alias latus, futurae parallelus, item fundo albidus.

In majoribus ad 7.<sup>1</sup>/<sub>3</sub> longis, fulci omnes saepe obsoletissimi, etiam in thorace; minimae 4<sup>3</sup>.<sub>4</sub> profundius canaliculatae.

*Color* fusco - aeneus, subtus cupreus, lateribus flavo - tomentosis.

#### D 5. *BVPRESTIS IVNCEA;*

*Tab. D. Fig. 5.*

Linearis aeneo - nigra, frontis thoracisque fossa excavata, elytris linearis - acuminatis, longitudinaliter biconvexis, obtusis.

Inter Insecta Indica ad me pervenit, sed incerta patria.

## DESCRIPTIO.

*Longitudo 7.<sup>III</sup> latitudo summa, ad elytrorum basin, vix 1<sup>3</sup><sub>4</sub>.<sup>III</sup>*  
*Color subitus ater, politus, supra obsolete niger, et subaeneus, fine ni-*  
*tore ullo.*

*Forma singularis. Caput inter oculos excavatum, triangulo ab ore*  
*adscendente polito.*

*Thorax brevis crassiusculus, lateribus margine flexuoso terminatus,*  
*fovea in medio dorso oblonga, undique abrupta.*

*Elytra longissima (sola 5 $\frac{1}{2}$ .<sup>III</sup>) extremo linear - adtenuata, apice*  
*obtusa, per totam longitudinem medio obtuse carinata, unde Insectum*  
*supra longitudinaliter biconvexum et secundum futuram velut convalle*  
*canaliculatum. Punctum utrinque politum ad scutellum. Pedes breves.*  
*Vid. fig. 5.*

## D 6. BVPRESTIS CARIOSA;

*Tab. D. Fig. 6.*

*Depressa, atra nitida, thorace dilatato albido - scabro;*  
*maculis laevigatis pluribus, elytris albido - lituratis.*

*Buprestis cariosa PALL. itin. III. app. p. 708. n. 52.\**

*In arenis Anketeri dictis; inter Kumam et Terek fl. satis fre-*  
*quens Majo, Cotinum florentem amans.*

## DESCRIPTIO.

*Magnitudo inter nostrates gigantea; forma Bupr. mariana; de-*  
*pressa, durissima, nigra nitida. Longitudo 1.<sup>II</sup> 3.<sup>III</sup> latitudo 6.<sup>III</sup>*

*Caput inter oculos punctis cariosis albidum. Antennae planae, fer-*  
*ratae, longitudine thoracis.*

*Thorax lateribus convexo - dilatatus; corpore paulo latior, su-*  
*pra albido - cariosus: areis laevigatis atris, 2. ad caput, 2. orbiculatis,*  
*mediaque lanceolata in disco, tribus ad posticum marginem, quarum me-*  
*diae insculptum punctum cordatum profundum.*

*Elytra* postice subangustata, obtusa, striis grossius punctatis exarata, sparsaque lituris albido - cariosis, passim inauratis.

*Pedes* subaequales, robustissimi; tarsis latis, utrinque profunde ferratis. Reliqua illustrabit Icon Fig. 6.

### D 7. BVPRESTIS TENEBRIOIDES;

Tab. D. Fig. 7.

Depressa, nigra, thorace dilatato scabro, areolis quatuor politis, antennis incrassatis.

Buprestis tenebrionis LINN. Syst. XII. p. 661. sp. II. GORTZE entom. I. p. 588. n. II.

Tenebrio variegata LEPECH. itin. I. p. 373. tab. 17. fig. 7.

Cucujus ater, thorace scabro, pulvere albicante consperso, elytris obsolete striatis. GEOFFR. par. I. p. 128. (e Languedocia).

SCHAEFFER ratisb. tab. 205. fig. 5.

Ad Volgam in floribus observatur passim, in calidioribus, herbidis.

### DESCRIPTIO.

Perquam similis praecedenti, at essentialiter diversa antennis, aliisque characteribus, et longe minor; longitudine vix  $7\frac{1}{3}.\text{III}$  latitudine thoracis  $3.\text{III}$  Nigra, subopaca.

*Caput* laeviusculum. *Antennae* longitudine capitinis, extrorsum craf- fiores, dentatae.

*Thorax* crassus, lateribus dilatato - gibbus, supra scaber, canescens, punctis laevigatis atris quatuor magnis, impressoque ad scutellum.

*Elytra* obtusa, striis interruptis, vel punctatis, obsoletioribus. *Pedes* proportione minus robusti. Confer. caeterum *Figura* nostra 7.

D 8. *BVPRESTIS HIVLCA;**Tab. D. Fig. 8.*

Fusco - aenea depressa, scabritie subtus aurata, thorace elytrisque longitudinaliter rugoso - hiulcis, areolis elytrorum geminis impressis cupreis.

*Buprestis mariana LINN. syst. XII. p. 660. sp. 6.*

*SCHAEFFER ratisb. tab. 49. fig. 1. et tab. 128. fig. 3.*

? *Buprestis Virginiensis DRVRY illustr. I. tab. 30. fig. 3. GOETZE entom. I. p. 596.*

In sylvis pineis, praesertim circa Obum fluvium, observatur rarius. *SCHAEFFERI* synonymon ipse ad Marianam suam citavit LINNAEVS inter addenda ad calcem *Tom. II. Systematis*, et convenit definitio systematis. Plane aliud Insectum sub *B. marianae* denominatione delineavit Ill. DEGEER, cuius locum infra ad *D 10.* allegabo.

## DESCRIPTIO.

Post *B. variolarem* et *cariosam*, nostratum maxima: longitudo  $1\frac{1}{2}\text{--}1\frac{2}{3}$  latitudo  $5\frac{1}{3}\text{--}6$ . *Subtus* punctis, lineolisque impressis, aeneo - aureis, creberrimis carioso - scabra; *supra* nigra, subaenea.

*Caput* rugis 2. crassis inter oculos longitudinalibus, interjecto sulco profundo, aureis punctis scabrato.

*Thorax* rugis obsoletissimis quinis longitudinalibus, quarum intervalla punctis cupreis scabrata. Foveolae depressiores versus posticos angulos. *Sternum* sulcis 2. longitudinalibus.

*Elytra* rugis obsoletis, longitudinaliter subconfluentibus; inter quas valleculae magis minusve cupreo - scabrae.

*Figuram 8.* hujus speciei comparationis gratia inserui, et erat jam tabulae inserta, priusquam Schaeferianas vidi, caeteroquin optimas.

## D 9. BVPRESTIS AVRATA;

Tab. D. Fig. 9.

Oblonga, depresso-ovalis, aurata, elytris sulcatis, integris, obtusis.

Buprestis aurata PALL. itin. II. app. p. 719. n. 45.

? Cucujus viridi - auratus, striatus GEOFFR. paris. I. p. 126. tab. 2. fig. 2.  
(sed multo minor nostratis).

? SCHAEFFER ratisb. tab. 35. fig. 6. (itidem nostra minor et pessime colorata).

In australibus ad Iaicum et Volgam aliquoties observata, ubi flores frequentat, sed rarissima. SCHAEFFERI iconem inter synonyma addititia ad Bupr. aurulentam suam (americanam) citavit LINNAEVS.

## DESCRIPTIO.

E majoribus europaeis, longitudinem  $10\frac{3}{4}.$  letitudinem  $3\frac{3}{4}.$  aequaliter solet. Corpus auratum viridissimum, splendidissimum; elytris versus latera cupreis. Dorsum sub elytris viridi aureum.

*Antennae* vix thorace longiores. *Tibiae* teretes, pubescentes. *Clypeus* punctis tribus impressis, disci duobus, tertio scutellari; at in posteriore sexu foveolae quinque symmetrice positae, et forma oblongior.

*Elytra* integerrima, decemfulcata. *Vagina* ani paulo ultra elytra prominula. Caeterum conf. Fig. 9.

## D 10. BVPRESTIS ACUMINATA;

Tab. D. Fig. 10.

Oblonga aenea, punctis carioso - aureolis varia, thorace dilatato, obsolete rugoso, elytris longe acuminatis, truncatis.

Buprestis mariana LINN. Faun. suec. II. 754. DEGEER inf. IV. p. 128.  
tab. 4. fig. 18.

PETIVER. gazoph. tab. 2. fig. 2.

SCHAEFF. ratisb. tab. 35. fig. 7. (male expressa).

In Russia Sibiriaque citeriore, locis sylvosis non infrequens; contra in Dauuria non observata est, ubi sequens abundat.

## DESCRIPTIO.

*Magnitudo* Bupr. rusticae, paulo latior, et (dempto postico acumine) brevior. Durissima, tota cupreο - aenea, inaurata scabra.

*Caput* planiusculum, punctis duobus verticis politis fusco - aeneis. *Antennae* thorace breviores, filiformes, articulo baseos aeneo.

*Thorax* latericus gibbosο - dilatatus, supra rugis derasis planis, fusco - aeneis, politis, longitudinaliter parallelis, quatuor vel subsenis, interdum lateralibus interruptis.

*Elytra* striis sulcata, inter strias alternis punctis laevigato - fuscis, caeterum cupreο - aenea scabra; postice producta acumine sublineari, truncato, subemarginata.

*Corpus* subtus magis cupreum; abdomen postice acuminatum, lineis 2. sub apice laevigato - fuscis. *Pedes* robusti, cupreο - aenei. — Videatur Fig. 10.

## D II. BVPRESTIS OXYPTERA;

Tab. D. Fig. II.

Oblonga, aenea, carioso - inaurata; elytris striatis, subacuminatis, praemorsis; thorace laevi.

*Mordella gigantea* SCOPOL. carn. n. 187.

? *Buprestis austriaca* LINN. syst. XII. p. 661. sp. 9.<sup>1</sup>

In tota Russia et Sibiria in pinetis aridis ubique occurrit, frequentius in Dauuria.

## DESCRIPTIO.

Simillima praecedenti, cuius tamen neque varietatem, nec sexu ad finem dixerim. Semper major, latior elytris, sed thorace angustiore, minusque lateribus gibbo. Caeterum minus quoque aurulenta et inelegantior B. acuminata, licet facie et elytrorum punctis laevigatis, inter

striae alternis conveniat; ut et scabritie aeneo - cuprea, et duritie totius corporis.

*Antennae* paulo longiores, magisque ferratae. *Clypeus* lateribus parum gibbus, scaber, ad posticum marginem inaequalis, rugis nullis, sed stria plerumque unica polita, per medium longitudinali. *Elytra* basi convexiuscula, subacuminata, sed multo breviore acumine, quam praecedentis, et acute praemorso.

Differentias formae docebit *Figura 11.* praecedenti collata.

### D 12. BVPRESTIS RVTILANS;

*Tab. D. Fig. 12.*

Depressa, cyaneo - viridissima, lateribus aurea, splendida, thoracis elytrorumque punctis nigro - aeneis glabris.

*Cucujus auratus striatus* G E O F F R. paris. I. p. 126. sp. 3. tab. 2. fig. 2. (exclusis synonymis).

*Buprestis rutilans* F A B R I C. mantif. p. 235.

In arbustis circa Choper et Tanaïn fluv. Iunio sub ardentissimo sole frequens; alias non obvia.

### DESCRIPTIO.

Pulcherrima et splendidissima inter europaeas omnes. *Magnitudo* infra Bupr. rusticam. *Desuper* inspecta, medio longitudinaliter viridissimo - sericea, lateribus aureo - rutilans; *ex obliquo* visa medio splendide cyanea, lateribus dilute viridi - aurea. *Subtus* pedibusque tota cyaneo viridique variante splendidissima.

*Thorax* punctato - scaber, lineola media et punctis sex nigris glabris.

*Elytra* striata, punctisque impressis scaberrima, punctis (ut in praecedentibus duobus) nigro - aeneis glabris, inter alternas striae sparsis, subquadratis notata, apice ferrulata, praemorsa. — Caeterum consultatur *Figura 12.* sed color pictoria vix ulla arte exprimendus.

D 13. *BVPRESTIS OCTOMACVLATA;**Tab. D. Fig. a. b.*

Depressa, nigro - aenea, elytris striatis obtusis, abdomeque flavo - maculatis, thorace flavo - submarginato.

*Buprestis flavo - punctata* DEGEER. *inf. IV. p. 129. sp. 2. GOETZE ent. I. p. 597. n. 12.*

Frequentissimam legi in pinetis ad Occam, Iulio 1768. alias rarius, nec unquam in Sibiria orientali. Rectissime hanc speciem a Bupr. octoguttata LINN. distinxit Ill. DEGEER. In truncis prostratis arborum expeditissime ad solem discurrit et volat.

## DESCRIPTIO.

*Magnitudo* et forma Bupr. rusticae, sed minus nitida, e chalybato vel cupreo - aenea. *Caput* plerumque circulo gemino flavo frontis contiguo.

*Thorax* subtilissime, punctatus, stria laevigata obsoletissima. *Clypeo* margo anticus, versus latera, rarius laterales flavi.

*Elytra* integra, obtusa, sulcata, maculis longitudinali serie digestis flavis, binis, ternis, quaternisve, difformibus et paucim confluenteribus varia.

*Abdomen* utroque margine flavo - dentatum, et subitus in medio duplice ordine macularum.

*Varietatem* maculis distinctis quatuor parium *Fig. 13. a.* at in lunulas confluentibus iisdem *Fig. 13. b.* exprimit.

D 14. *BVPRESTIS OCTOGVTTATA;**Tab. D. Fig. 14.*

Depressa coeruleo - chalybata, elytris striatis praemorsis, quadriguttatis; abdominis punctis, thoracisque oris lateralibus flavis.

Bupre-

*Buprestis coeruleascens*, thoracis lateribus flavis, elytris singulis maculis 4.  
LINN. *itin. scan.* p. 23.

*Buprestis coerulea*, nitida, macularum quatuor paribus flavis VODMAN  
*nov. spec. p. 21. n. 42.*

*Buprestis octoguttata* LINN. *syst. XII. p. 659. sp. 2. Faun. II. n. 753.*

*Buprestis albopunctata* DE GEER *inf. IV. p. 132. tab. 4. fig. 20. (mala).*

LEPECHIN. *itin. II. p. 323. tab. 10. fig. 5. 6. (Varietas minor, sexguttata).*

*Elater octavus* SCHAEFER. *ratisb. t. 31. f. 1.*

In pinetis arenosis passim, etiam ad Irtin fl. observata, constans  
fine notabili variatione.

#### DESCRIPTIO.

Paulo minor praecedente, cui simillima, sed angustior, elegan-  
tior, tota chalybis politissimi instar coerulea, nitida. *Clypei* margines  
tantum laterales latius flavi. *Elytra* singula punctis vulgo quatuor distin-  
ctissimis guttata, quarum unum ad ipsam basin; praeterea macula exte-  
rioris marginis latera quoque pectoris occupans. *Abdomen* punctis flavis  
serie quadruplici. *Figuram* 14. addidi, ut praecedenti melius conferri  
queat.

#### D 15. BVPRESTIS PICTA;

*Tab. D. Fig. 15.*

Depressa aenea, elytris trinerviis, maculis multiformibus  
symmetricis flavis.

*Buprestis picta* Pall. *itin. II. append. p. 719. n. 46. GOETZE entom. I. p. 599.*  
*n. 17.*

In maxime australibus ad Iaicum aestate flores frequentat; alibi  
non observata.

#### DESCRIPTIO.

*Magnitudo* praecedentis; sed *forma* simillima Bupr. chrysostigmati,  
nisi pone acutior. Tota obsoletius aenea, maculis subtus nullis.

*Caput* canescens. *Thorax* stria obsoletissima, nitore subcupreo.  
*Elytra* trinervia, maculis quatuor parium: *primi* paris axillares, quasi

K

e tribus, (subinde distinctis), compositae; proximae futurae approximatae, majusculae; hinc tertio punctum utrinque exteriori margini vicinum, et demum versus apicem lunatae, apicibus convergentes, saepe bipartitae. Hae melius apparent in *Figura 15.*

## D 16. BVPRESTIS CHRYSOSTIGMA;

Tab. D. Fig. 16.

Depressa, elytris quadrinerviis, areolis impressis aureis, femoribus anticis crassis, unidentatis.

*Cucujus fossulis impressis GEOFFR. paris. I. p. 125. sp. r.*

*Buprestis chrysostigma LINN. syst. XII. p. 660. sp. 7. Faun. II. n. 755. & V. L. ZER gen. t. 6. f. 39. DEGEER inf. IV. p. 129. n. 3.*

In sylvis borealioribus a Russia usque in Dauuriam, sed rarius, observatur. Paulo minorem europaea, stigmatibusque obsoletioribus, alias simillimam, Noveboraco Americes accepi.

## DESCRIPTIO.

*Magnitudo* proxime Bupr. octoguttatae, sed quaedam individua minora. Depressa; subtus medio viridissimo - aurea, versus margines, ut et pedibus, elytrorumque ora, nitidissime cuprea; supra aeneo - nigra.

*Frons* canescens - albida. *Thorax* postice sinuatus vel lobatus. *Stria* capitidis, thoracisque longitudinalis, arguta.

*Elytra* scabriuscula, nervis quatuor longitudinalibus, futuraque prominula; nervorum extimus margini, interior futurae parallelus, medii extremo in unum conjuncti, abbreviati, bis interrupti: areolis cuneo - inauratis, impressis, subquadratis.

*Dorsum* sub elytris splendissime coeruleum. *Femora* antica crassa, subtus dente crasso angulata.

*Variat* haec species, quam pro comparatione praecedentis in *Tabula* adjeci (*Fig. 16.*) elytris politis, laevioribus, vix mediis nervis postice conspicuis; qui videntur *Mares.*

D 17. *BVPRESTIS ORICHALCEA;**Tab. D. Fig. 17.*

*Crassiuscula oblonga, aeneo - varians, elytris subserratis, laevibus, thorace subtrilobo, dorso abdominis splendide coeruleo.*

**BARREL.** *icon. plant. tab. 966.*

Major, quam Figura exprimit, frequens e Lacus Inderiensis muria legi potest; alias rarissime in australibus Tatariae desertis occurrentes. At minor, quae semper est cupreo-splendida, ad Irtin in Robinia Halodendro florente, et in Dauria totiusque Sibiriae ulterioris australioribus satis frequens est.

**DESCRIPTIO.**

**α. MAIOR:** Circumscriptione aequat *B. marianam*, sed est crassiuscula, utrinque convexa. *Thorax* elytris fere latior, convexus, laevissimus, postico margine subtrilobus. *Elytra* per series punctata, apice ferrulata. Haec varietas subtus viridissime aurea; supra thorace elytrisque vel totis, vel extremo, obscure viridi-splendidis, basi in quibusdam violaceo-chalybea, nitidissima. Longitudo  $7\frac{1}{2}.$  III

**β. MINOR:** Cuprea; modo viridi, aeneo-variens; modo cupreo undique nitore pura. Posterioribus, quae saepe 5 lin. minores sunt, *elytra* apice subpraemorsa, vix evidenter ferrata. *Dorsum*, sub alis, in omnibus cyaneo splendidissimum; ut et in **α.** quam solam delineandam curavi, *Fig. 17.*

D 18. *BVPRESTIS TERETICOLIS;**Tab. D. Fig. 18.*

*Crassiuscula, aurato-viridissima, polita; thorace antice cylindraceo; elytris laevissimis praemorsis, apice aureo-rutilis.*

Inter alia Infecta, pro Brasiliensi, transmissa a Celeb. DRVRY, Londinenſi.

K 2

## DESCRIPTIO.

Oblongior majore praecedentis varietate  $\alpha$ . Minus dura congeneribus reliquis, tota ex aurato - viridi - cyanea, splendidissima. *Caput* minusculum. *Thorax* versus caput coarctatus, teretiusculus, postice latior, angulis exquisitis, et impressione obsoletissima intra angulos. *Elytra* subventricosa, politissima, striis punctisve conspicuis nullis, postice subacuminata, aureo - rutila, apice praemorsa. *Abdomen* subaureum, maxime dorso sub elytris. *Alae* fuscae. *Pedes* tenues, posticii majores. Vide Figuram 18.



## E I. MELOE ERYTHROCHEMA;

Tab. E. Fig. 1.

Aptera, nigra; elytris dehiscentibus, excavato-punctatis; femoribus rubris.

In jugo campestri inter Samaram et Iaïcum excurrente, observata Majo 1773. alias nunquam obvia.

## DESCRIPTIO.

*Magnitudo* Proscarabaei minoris, eidemque valde similis. Sed *caput* et *thorax* scaberrima. *Thorax* supra subquadratus, impressionibus tribus longitudinalibus, subparallelis. *Elytra* ad scutellum connata, late dehiscentia, punctis magnis, excavatis, distinctis. *Corpus* totum nigrum, nitidulum; *Femora* coccineo - rubra, tantum ad ipsa genicula nigra. *Antennae* extrorsum paulo crassiores. Vide Tab. E. Figuram I.

## E. 2. MELOE VRALENSIS;

Tab. E. Fig. 2.

Aptera, atra, minuta; elytris basi connatis laevissimis.

Meloë uralensis PALL. itin. II. app. p. 722. n. 56.

An Meloë viennensis SCHRANK. observ. p. 71.?

Primo veris initio, ante Proscarabaeum, totoque Aprili cum eodem promiscue abundat in collibus circa Vpham, inque Vralensium et altaicarum alpium apricis. Odore subviolaceo, sed debilissimo, dotata.

## DESCRIPTIO.

*Magnitudo* muscae carnariae, imo saepe vix M. domestica major; tota atra, parum nitida, sed laevis et glaberrima. *Forma* Proscarabaei, sed elytra proportione majora, laevissima, exterius carinata; et *Caput* latius. *Thorax* supra planiusculus, medio longitudinaliter et utrinque lacuna obsoleta impressus. *Abdomen* marginatum. *Antennae* in utroque sexu filiformes, non fractae. *Pedes* maiores feminis. — Specimen quod *Figura 2.* nostra expressissimum, giganteum in sua specie est, qualia rarius occurunt.

## E 3. MELOE PLAGIATA;

Tab. E. Fig. 3.

Alata, pubescenti - atra, elytrorum maculis orbicularibus baseos, plagiisque duobus transversis flavis; antennis extremo ferrugineis.

? *Cantharis Cichorii* DE GEER *Ins. V. p. 17. tab. 13. fig. 2.*

Ex India orientali acceptam Amicus e Belgio transmisit, inter alios. Cum sequentibus hucusque confuse sub *Meloës Cichorii* nomine comprehensa fuisse videtur, vere licet distincta species.

## DESCRIPTIO.

Est e maximis inter adspices; tota aterrima, nitidaque, licet atra lanugine pubescens. *Antennae* basi nigrae, extrorsum crassiores, parte incrassata (sex articulorum) fulvo - lutea. *Thorax* a dorso planiusculus, subbiangulatus, mediaque stria notatus; antice haud productus, utrinque foveola obsoleta impressus. *Elytra* polita, piceo - atra, postice latiora; ad basin macula cujuslibet in medio orbiculata flava, et fasciae duae latae, ad futuram interruptae, seu plagae transversae ejusdem coloris, quarum prior paulo ante medium; posterior latissima, apici

K 3

proxima. *Pedes* atri, longiores quam in sequentibus. — Magnitudo et pictura elytrorum *Figura 3.* nostra accurate expressa sunt. — — *Degeeriana* differt eo, quod elytrorum basis tota indicetur flava, videturque potius distinctam speciem constituere, inter has priores et *M. lunatam* intermedium, nisi sit gigantea varietas *Meloës* variabilis.

#### E 4. MELOE PHALERATA;

*Tab. E. Fig. 3. b.*

Alata, pubescenti - atra; elytrorum maculis quatuor basos, fasciisque duabus undulatis flavissimis.

Inter Insecta orae cисганетicae Indiae hanc transmisit *Illiustr. Lib. Baro DE RENGERS.* Species a praecedenti distinctissima, propius ad sequentem accedit, et ab Entomologo hucusque nullo rite distincta fuit.

#### DESCRIPTIO.

*Magnitudo* praecedentis. Differt: atro *Colore* minus nitido, languine tenuiore; *antennis* paulo brevioribus, totis atris; *thorace* antice productiusculo angustiore, posterius a dorso didymo; *elytris* opaco - atris, ad basin singulis macula dorsali orbiculata, et ad lateralem marginem ovali; *fasciis* dein non interruptis, undulatis, angustioribus, ab apice remotioribus, aequali latitudine parallelis; *pedibus* denique minus longis, robustissimis, et anticum tibiis antice canescenti - lucidis. Caeterum *elytra* postice latiora, subcompressa, ut in affinibus; et color fasciarum macularumque aurulente luteus, totaque elytrorum facies tenerrima hirsutie holofericea, quod, non in antecedenti.— Caetera indicat *Fig. 3. b.*

#### E 4.\* MELOE BIVNDVLATA;

*Tab. H. Fig. E.\* 4.*

Alata, pubescenti - atra; elytrorum maculis quatuor basos, fasciolisque duabus undulatis fulvis.

? *Meloë Cichorii LINN. Amoen. acad. V. tab. 3. n. 188. 5.*

Inter Insecta capensia frequens adfertnr, colore, fasciis et reliquis criteriis a praecedentibus constanter distincta, licet simillima, et apud Entomologos pro una cum iisdem specie vulgo habita. LINNAEI icon potius ad hanc, quam praecedentem pertinere videtur.

### DESCRIPTIO.

Paulo major praecedentibus, corpore elytrisque etiam latior; et omnino maxima inter Meloides alatas. *Antennae* valde incrassatae, apice incandescentes, sed totae nigrae. *Thorax* antrorsum adtenuatus, teretusculus, posterius a dorso planiusculus, nec didymus; totus, ut et corpus, brevissima lanugine holosericeus. *Elytra* vix evidenter lanuginosa, sine nitore aterrima, *maculis* ad basin orbiculari a dorso, et ad marginem lateralem oblonga; dein *fasciis* multo angustioribus, quam praecedentis, magis undulatis, a se invicem remotioribus, obscure fulvoluteis. *Tibiae* anticae canesceni - argentatae, ut praecedentis, a qua praesertim thorace, situ colore et latitudine fasciarum, et crassitie corporis paulo majore, differt; unde pro varietate vix potest haberi et icone illustranda erat: *Tab. H. Fig. E 4.* \*

### E 5. MELOE LVNATA;

*Tab. E. Fig. 5. a. b.*

Alata, pubescenti-atra; elytrorum area lunata, fasciisque duabus subconfluentibus flavis.

Haec quoque species inter Capensia Insecta satis frequens ad nos defertur.

### DESCRIPTIO.

Paulo minor praecedentibus, multoque brevior, et proportione crassior. *Antennae* magis clavatae, quam prioribus, totae fere fulvae, praeter infimam tenuissimam partem fuscam. *Thorax* suborbiculatus, a dorso convexus, adeoque diversus ab omnibus praecedentibus; totus, cum corpore, fusca lanugine pubescens. *Elytra* vix evidenter holosericea, nitidula; *area* communi lunata, concavitate scutellum spectante

dorsali, et utrinque parva *macula* ad lateralem marginem basilaris, *fasciis*. que duabus latis, subundulatis, a dorso circa futuram plerumque duplice isthmo confluentibus, gryseo - flavis. — In quibusdam etiam area lunata cum priori fascia, fasciaeque inter se late confluunt, ut *Fig. 5. a.* minori gradu indicat; plerumque distinctissima eadem, ut in *Fig. 5. b.* a dorso elytra sola exprimente. Rarius etiam fasciae inter se distinctae. *Tibiae* anticae hinc incanac. *Alae* ferrugineo - fuscae.

## OBSERVATIO.

Ab omnibus istis distinctissimus est *MELOE capensis LINNAEI*, mihi quoque probe cognitus, sed cuius specimen in promptu nullum nunc est, unde icon adjici non potuit. Descriptionem olim exarataam hic interim addo:

*Magnitudo* infra priores omnes, nec multo supra Attel. apia-  
rium. Tota aterrima, pubescens. *Elytra* vix lanuginosa, singu-  
la ad basin *macula* prope scutellum *lunata*, extrorsum spectante, cui  
opposita *linearis*, ad oram lateralem; dein maculae 2. *futurales*, commu-  
nes, transversim oblongae, et *utrinque* *duae* aliae, his alternae, paulo  
anteriores, marginique laterali insistentes. *Alae* nigricantes. — *LIN-  
NAEI* descriptio in *Mys. regin. p. 104.* expressione tantum differt.

## E 6. MELOE QVATVORDECIMPVNCTATA;

*Tab. E. Fig. 6.*

Alata, nigra, cano - pubescens, elytris gryseo - pallidis,  
vitta utrinque axillari, punctisque subdenis nigris.

*Attelabus polymorphus Pall. itin. I. app. p. 466. n. 44. β.*

Frequentissimum Insectum ad Montes altaicos et Irtin fl. in Ha-  
lodendro et Meliloto, cum sequenti aliisque Meloidibus promiscue. Nun-  
quam aliena copula junctam vidi; nec in aliis, ubi sequens datur, regio-  
nibus aequre frequens observatur, unde specie distinctam esse constat;  
licet ad aliquas sequentis varietates similitudinem referat insignem.

DE-

## DESCRIPTIO.

*Magnitudo* paulo infra Attelabum apiarium; aliquando gracilior sequente, et lanugine per totum corpus incanescens, non atra, diversa. *Thorax* perfecte cylindraceus, coarctatus. *Elytra* gryseo - flavente pallida, a dorso evidentius pubescentia; *fasciola* abbreviata, seu oblonga macula ab axilla descendens, margini laterali parallela, et saepe nigredine orae basilaris elytrorum usque ad scutellum continuata. *Huic maculae*, versus suturam, oppositum *punctum*; *duo puncta* in medio elytro, et *duo*, cum interiecto minutissimo, versus apicem nigro - marginatum. — *Variat* haec species colore rarius intensiore, lutescente elytrorum. Ceterum inspice Fig. 6.

## E 7. MELOE VARIABILIS;

Tab. E. Fig. 7. 14. a. b.

Alata, pubescenti - atra, elytris luteis nigro - fasciatis, apiceque atris.

Meloë fasciatus F V E S L I N. helvet. 398. tab. fig. 1. a. b. c. d. (Varietates).

S V L Z E R hist. inf. p. 66. tab. 7. fig. 11.

Cantharides fasciatae I M P E R A T. hist. nat. p. 921. fig.

Flores varios frequentat haec species, estque in australibus Rufiae atque totius Sibiriae, mensibus Maio atque Iunio tanto copiosior, quanto rarius in Europa occidentaliore occurrit.

## DESCRIPTIO.

Vulgatissima facies haec est: *Magnitudo* praecedentis, vel paulo major, saltem crassior; tota aterrima, lanugine quoque atra. *Thorax* teretiusculus, convexus, impressione nulla. *Antennae* ut in affinibus extorsum crassiores, depressiusculae. *Elytra* postice latiuscula, subcompressa, gryseo - lutea, quasi oleo inuncta, *fasciis* 2. undulatis, et apice toto atra, (nigredine apicis anterius repanda, uti fasciae). Talem maxime vulgarem exprimit Fig. 7. eandemque F V E S L I N loc. cit. Fig. 1. a.

L

*a. Variat* haec interdum fascia priore angustiore, vel interrupta et in maculas magis minusve coarctatas, tres vel quatuor, dissecta, ut FVESLIN l. c. Fig. 1. a. habet.

*b. Major* varietas rarius in maxime australibus ad Iaicum lecta fuit, elytris gryfeis, immaculatis, vel tantum apice nigris (Fig. 14. a.), vel insuper fascia undata posteriore praedita (Fig. 14. b.); in utraque adeo punctum utrinque axillare unicum nigrum. Hanc etiam FVESLIN loc. cit. Fig. 1. b. observavit.

*y. Datur* apud nos etiam *minuta*, varietas, quam delineavit FVESLIN l. c. Fig. 1. c. ad Irtin et Volgam praeferit observabilis.

An Mylabris trimaculata FABRIC. ent. p. 261. hujus forte var. *α-β?*

### E 8.\* *MELOE FLORALIS;*

*Tab. H. Fig. E. 8.*

Alata, pubescenti - atra, elytris macula baseos apicisque, intermediis fasciis binis pallidis.

Attelabus polymorphus PALL. it. I. app. p. 465. n. 44. *α.* GOETZE ent. I. p. 422. n. 2.

Clerus SCHAEFFER. ratisbon. tab. 151. fig. 3.

? FVESLIN. helvet. Tab. fig. 1. e.

Hanc in Germania quoque passim, sed rarius observabilem speciem, copiose alunt regiones herbidae australiores ad medianam Volgam et circa Vralensia promontoria, ubi promiscue cum antecedentibus in floribus et plantis, praeferit Diadelphis, occurrit Majo.

### DESCRIPTIO.

*Forma* et *magnitudine* refert omnino Mel. punctatam; thorace magis tereti quam proxime praecedentis: *Lanugine* vero tota fusca pubescit, et pedes paulo robustiores, lanugine magis hirsutos habet. *Elytra* atra, nitidiora quam in praecedente, nec dehiscentia, situ et colore (magis pallida) fasciarum diversa. *Macula* in singulo elytro orbicularis

ad basin, et transverse ovalis in apice; *fasciae* inter has aequidistantes duae undulatae, futura nigra interruptae, contraque laterali ora usque ad basin pallida connexae. Neque sexus diversitas ulla in his appetet.

*B.* In Sibiria *varietas*, ut videtur, hujus *minuta*, fasciis flavis maculisque latioribus et saepe inter se varie confluentibus, apicis macula *minuta*, magnitudine infra Mel. bivulneram, frequens occurrit; contra abest descripta prior, quae Germanicae simillima est.

### E 8. MELOE SPLENDIDVLA;

*Tab. E. Fig. 8.*

Alata, coerulante atra, pubescens, elytris luteo - fasciatis maculatisque.

Parvula, sed elegans species in regionibus transbaicalensibus, praesertim Dauria, frequentissime in plantis et floribus, cum M. speciosa occurrit.

### DESCRIPTIO.

Minuta, statura M. bivulnerae, et magnitudine fere aequa variabili. Variabilis etiam elytrorum pictura. Totius *color* coerulante ater, sericeus, nitidus, tenui lanugine nigra obumbratus. *Elytra* plerumque (ut in *Figura 8. nostra*, quae summam speciei magnitudinem exprimit) posterius fasciis binis latis, flavis signata, quarum prior ad margines non perducta, antrorsum, altera retrorsum arcuata, unde aliis dilatatae medio inter se confluant in aream ephippii specie. In quibusdam accedit macula ad singuli elytri basin orbicularis. At in non paucis flavedo ita diffluxit, ut tantum supersint maculae elytrorum nigrae, dispositae fere ut in M. sericea: nempe dorsales 2. communes, utrinque 2. laterales, maiores et apex elytrorum totus niger, cum ora laterali.

E 9. *MELOE* SPECIOSA;*Tab. E. Fig. 9. a. b.*

Alata, coerulante atra, pubescens; elytris subcoccineis, maculis punctisque sericeo - atris.

*Meloë festiva* PALL. *itin. II. append. p. 721. n. 54. var. a.* GOETZE *en-*  
*tom. I. p. 702. n. 6.*

Pulcherrima haec species Iunio in campestribus ad Irtin abundat, in Robinia praesertim Halodendro, dein Rosis, Astragalis et Meliloti. In Dauria major, hirsutior, colore subdiversa, varios frequentat flores, non minus crebra.

## DESCRIPTIO.

Vulgo M. vesicatoria crassior, et daurica (*Fig. 9. b.*) ad maximas hujus generis accedit. *Forma strictior masculis. Antennae longiusculae, extrorsum crassiores.* *Corpus praeter elytra totum, cum sericeo-viridi, vel subcoerulante nitore atrum, lanugine fusca dauricis, canescente ad Irtin lectis.* *Thorax versus scutellum leviter impressus. Elytra subcompressa, modo laete coccinei sed pallidioris, modo lateritii coloris, maculis atris, vix sericeo - nitentibus, minusculis, constantibus nisi magnitudine et quod subinde in fascias cohaerescant.* — *In singulo elytro macula ad basin oblonga, lateralis et rotunda futurialis a scutello remotior; tres in medio, quarum futurae proxima minor et duae subcohaerentes, quae saepe in maculam transversam, margini adhaerentem confluxerunt; puncta denique duo versus apicem nigro - marginatum.* Atque haec distincta omnibus; contra maculae ad basin et in medio in dauricis subinde in duas fascias coalitae.

Daurica (*Fig. b.*) hirsutior, nitore ex coerulo, atro constanter differt; Irtinensis virescente splendidula (*Fig. 9. a.*). In alpinis frigidis Dauriae dantur paulo minores, degeneres, elytris pallidioribus, maculis minutis, pluribus saepe oblitteratis, ita ut quibusdam tantum supersit punctum axillare, futurale, macula parva medii marginis et punctum minutum extremitatis exterius. Apex elytrorum his vix extima ora nigret.

E. 10. *MELOE SERICEA*;*Tab. E. Fig. 10.*

Alata, sericeo - virescens, lanuginosa, elytris coccineis dorso pallidioribus, maculis subconfluentibus margineque nigris.

Meloë festiva, variet.  $\beta$ . PALL. *itin. II. p. 721.*

Ad Irtin cum praecedente promiscue et copiosissime, eodemque tempore in iisdem plantis observatur. Copula tamen semper distincta, et in Dauuria ulterioreque Sibiria plane deeit.

## DESCRIPTIO.

Praecedente triplo minor, strictiorque, plane cylindracea, capite paulo majore. *Facie*, colore ac forma thoracis et antennarum adeo similis, ut alterum sexum dices, nisi in utraque specie diversi sexus convenienter, constantibus differentiis.

*Thorax* huic aequalis, subinde puncto gemino obsolete impresso. *Elytra* angustiora, nitidiora, intensius coccinea, plerumque secundum futuram exsoletiora. *Maculae* eodem situ, ac in praecedenti, sed magis diffluentes, nitidius viridi - sericeae, connexae limbo elytrorum undequaque nigro. *Color corporis* splendidior, e viridi - sericeo ater. — Quantum a praecedente differat e collata *Fig. 10.* nostra facile appetet.

E 11. *MELOE CALIDA*;*Tab. E. Fig. 11.*

Alata, pubescenti - atra; elytris latiusculis croceis, basi punctis geminis, maculisque duabus reniformibus nigris.

*Chrysomela Cichorii* HASSELQVIST. *itin. p. 449. n. 101.* (vere haec!)

In maxime australibus ad Volgam et Iaicum circa Centaureas et Echinopodas florentes non infrequens. Minor et macula postica saepe obliterata, alias simillima, in Sibiriae orientalis, Dauuriaque calidioribus occurrebat. LINNAEI Meloë cichorei certe non est haec, licet HASSELQVISTIVM citet.

## DESCRIPTIO.

Saepe ad maximas statura accedit, transverso pollice major; sed inconstans magnitudo. Praeter elytra, tota aterrima, nigraque lanugine pubescens. Antennae paulo longiores extorfumque crassiores, quam in subsecente, alias simillima; Corpus etiam huic crassius. Elytra extremo latiora, magis compressa, nec quidquam dehiscentia, intense lutea, nunquam apice vel margine nigra. Puncta versus basin elytrorum quatuor transverso ordine; macula reniformis in medio singuli elytri, aliaque similis posterius, sed ab apice valde remota, rarius in punctum et maculam divisa. -- Figura 11. nostra insigniorem magnitudinem exprimit, quam non multo excedit haec species.

E 12. *MELOE MELANVRA*;

Tab. E. Fig. 12.

Alata, pubescenti - atra; elytris luteis, basi punctis geminis, macula reniformi, apiceque nigris.

Meloë quadripunctata LINN. Syst. XII. p. 680. sp. 6.

PALL. itin. II. append. p. 722. n. 54. b. varietas.

In maxime australibus ad Volgam et Iaicum occurrit, florentes Centaureas frequentans. Simillima praecedenti, sed constanter macularum situ diversa.

## DESCRIPTIO.

Par Mel. speciosae, adeoque secundae magnitudinis. Insectum praeter elytra totum, etiam lanugine, aterrimum, attamen politum. Thorax cylindraceus et caput vix discretum, ut in his omnibus, quae antennas subclavatas habent. Elytra extremo compressiuscula, testaceo-lutea, constanter macula reniformi terminali seu apice toto atra. In medio macula reniformis singuli elytri (saepe in duo puncta inaequalia divisa), versusque basin puncta aequidistantia, transverso ordine posita simul quatuor, ut in praecedenti.

E 12.\* *MELOE SOLONICA*;

Tab. H. Fig. E. 12.\*

Alata, pubescenti - atra, elytris luteis, vitta puncto que baseos, maculis 2 reniformibus, terminalique ora nigris.

In Dauriae calidioribus sat frequens; nec fere alibi observata; unde, licet simillimam duobus praecedentibus et non gravioribus critriis, quam istae inter se, discrepantem, specie tamen distinguendam censeo.

## DESCRIPTIO.

*Magnitudo et forma* apprime praecedentis. *Thorax* dorso, puncto in medio impresso, quod non praecedenti. *Lanugo pectoris*, femorumque certo adspectu canescit, quod pariter non in praecedentibus. *Elytra* intensius lutea, versus basin puncto utrinque ad futuram, et prope marginem lateralem *fasciola* abbreviata longitudinali, a basi descendente; *macula* in medio reniformis magna; altera, puncto interius stipata, versus apicem, sed ab ipso apice, cuius ora fusca, satis remota; ut in *M. calida*. *Elytra* apice valde dehiscunt, ut in *M. speciosa*.

E 13. *MELOE CROCATA*;

Tab. E. Fig. 13.

Alata, pubescenti - atra, elytris subventricosis croceis, punctis duodecim nigris.

*Meloë lutea* PALL. itin. II. app. p. 722. n. 546. GOETZE entom. I. p. 702. n. 7. (exclusa Variet.)

In Sibiria australiore campestri, maxime inter Irtin et Ieniseam, frequentissima species; at in Russia, faltem mihi, vix observata. Nunciavit vero nuper *Amiciss. HABILIZL*, in hortis circa Astrachaniam saepe frequentissimam et nocivam esse, misitque specimina Sibircis solitis minora, pulcherrime crocea. In Sibiria haec species amat Haloden-

dron, Melilotum aliasque leguminosos et labiatos flores. *Oleum* geniculatis, ut affines omnes, fundit flavissimum, Coccinellae contritae odore.

## DESCRIPTIO.

Praecedentibus plerumque paulo minor, et *magnitudine* admodum variat, saepe ut 1 : 3. *Thorax* obsoleta impressione versus scutellum subtripunctatus. *Corpus* latius, elytra ventricosiora, quam praecedentibus, necquidquam dehiscentia. *Insectum*, praeter elytra, totum cum lanugine exquisite atrum. *Elytra* intense crocea, singula punctis nigris trium parum, plerumque distinctissimis; quorum primum a basi remotius, secundum paulo majus in medio, tertium par versus apicem minuscum, ordine obliquo positum. In raris paria media, interdum et basilare, subconfluunt. In minoribus etiam puncta plerumque exigua.

E 14. *MELOE BALTEATA*;

*Tab. F. Fig. E. 14.*

Alata, nigra subpubescens, elytris luteis, basi, punto, fascia media, apiceque nigris.

Ex ora cis-Gangetica Indiae satis copiose inter alia *Insecta* adfertur, et a variis inter Belgas amicis communicata fuit.

## DESCRIPTIO.

*Magnitudo* paulo supra *Mel. variabilem* et quaedam specimina vix superant. *Forma* brevicula, fere ut *Mel. lunatae*. *Corpus* atrum brevissimo tomento lanuginosum. *Caput* valde discretum, ob thoracem ante angustatum. *Antennae* tantum basi adtenuatae, caeterum crassae, apice acutissimae. *Elytra* latiuscula, postice subventricosa, ab domine breviora, nec dehiscentia, lutea, basi trilobato-atra, *fascia* media lata, et *lunula* terminali in apice atris. *Atomus* niger utrinque medio inter basin et fasciam, in minoribus evidentior; at in majoribus, qualem *Fig. E. 14.* exprimit, perexiguus.

E 15.

E 15. *MELOE OCELLATA*;*Tab. E. Fig. 15.*

*Alata, cano - lanuginosa, elytris pallidis, punctis duodecim ocellaribus.*

*Meloë ocellata* PALL. *it. II. app. p. 721. n. 53.* GOETZE *entom. I. p. 702. n. 5.*

In australibus aridis ad Iaicum rarissime observata.

## DESCRIPTIO.

*Magnitudo et forma Mel. floralis. Corpus nigrum, cano - lanuginosum. Pedes testacei. Caput et thorax lanagine e cano pallida obnebulata. Elytra pallida, punctis in quolibet trium parium, dilutiore halone cinctis: intervallis halonum fuscescente inquinatis, unde obsolete ocellata apparent. In postico pari punctorum interiora majora.*

E 15.\* *MELOE ARABICA*;*Tab. H. Fig. E. 15.\**

*Alata, glabriufcula, atra: antennis subclavatis rufis, elytris luteis, basi octo - punctatis, fascia apiceque nigris.*

Inter Infecta Arabica a FORSKOLEO lecta adlatam, accepi.

## DESCRIPTIO.

*Magnitudo proxime Mel. variabilis, sed brevior, fere glabra, tenuissimo et vix conspicuo tomento canescens, certoque adspectu toto corpore atra. Oculi fusci. Antennae valde incrassatae rufo - luteae, basi tenuiore fuscae. Thorax antice non adtenuatus, subquadratus. Scutellum nigrum. Elytra ochreo - lutea, subholosericea, singula puncto basiliari paulo exterius; dein tribus transversim in quincuncem positis, quorum medium posteriusque reliquis majus est; tunc fascia paulo pone medium transversa, vix undulata, ad futuram intersecta; denique toto apice nigro. Caeterum vide Fig. E. 15.\**

M

E 16. *MELOE ATRATA*;

Tab. E. Fig. 16.

Alata, aterrima, pubescens, elytris apice fasciaque postica flavo - luteis.

Meloë atrata PALL. *itin. II. append.* p. 722. n. 55. GOETZE *entom. I.* p. 702. n. 8.

?Meloë Gouani LINN. *additam.* p. 1068. n. II. GOETZE *ent. I.* p. 701. n. 1.

Copiose occurrebat ad Irtin, in Gypsophila paniculata, Dracoccephalo thymifloro, Nepeta ucranica et Clematide florentibus; nec alibi per Sibiriam oblata.

## DESCRIPTIO.

Distinctissima ab omnibus praecedentibus et sine omni varietate species; constanti fere semper *magnitudine*, dimidio circiter minor Mel. variabili. *Thorax* aequalis. *Elytra* pone subventricosa, compressiuscula, fascia versus apicem undulata, maculaque in ipso apice fulvo - luteis. Caeterum aterrima, etiam lanugine, et nitidula.

E 17. *MELOE FENESTRATA*;

Tab. E. Fig. VI. a. b.

Alata filicornis, lutea, pectore fusco, elytris apice nigris.

Meloë fenestrata PALL. *itin. II. append.* p. 720. sp. 47. GOETZE *entom. I.* p. 703. n. II.

Cum maculis (*Fig. VI. a.*) in australibus ad Iaïcum, circa Sarsatschik collecta fuit; sed varietatem immaculatam in Hyrcania legit GMELINVS, eademque paulo minor (*Fig. VI. b.*) ad inferiorem Tanaïn Vmbellas Libanotidis satis copiose frequentat Iulio. Genicula oleiflua.

## DESCRIPTIO.

*Magnitudo* saepe paulo infra praecedentem. *Facies* et *antennae* Cantharidis; *thorax* latiusculus, suborbiculatus convexus, stria impressa

longitudinali. Insectum totum testaceo - luteum, glabrum. *Pectus* subpubescens, basis abdominis in medio, oculique nigra; *antennae*, tarsique *pedum* fusci. *Elytra* magis grysea, apice semper nigra: at in orientaliore varietate, quae Tanaense paulo major est, *maculae* infuper in singulo elytro duae quadratae nigrae.

*Fig. 17. a.* Varietatem Iaicensem maculatam, *VI. b.* Tanaensem, minorem, immaculatam refert.

### E. 18. *MELOE QVADRIMACVLATA*;

*Tab. E. Fig. 18.*

Alata, filicornis atra, elytris luteis, nigro bimaculatis.

*Meloë quadrimaculata* PALL. *itin. II. app. n. 47.* GOETZE *entom. I. p. 703.*

*n. 12.*

*β. Meloë bimaculatus* LINN. *sys. XII. p. 680. sp. 9.* (*Varietas bipunctata*).

*Pyrochroa bimaculata* DEGEER. *inf. V. p. 22. tab. I. fig. 18.*

In australibus Russiae totiusque Sibiriae occurrit Junio, frequens in Centaurea Scabiosa et Spiraeis florentibus. *Oleum* e geniculis stillat more congenerum, odore coccinellae contritae.

### DESCRIPTIO.

*Magnitudo* Cantharidis fuscae, nisi brevior; dantur autem multae statura pygmeae. *Facie* magis, quam reliquae congeneres, ad Cantharides accedit; *Capite* tamen discreto, postice angulato subcordato ad Meloides pertinet, ut et thorace elytris multo angustiore, depressiusculo. *Corpus* totum aternum, glabrum, nitidum, solo pectore subpubescente. *Thorax* convexiusculus, aequalis. *Antennae* setaceae, cum pedibus nigrae. *Elytra* latiuscula, subacuta, gryseo - lutea, plerumque singula maculis duabus subquadratis, una pone alteram, aequidistantibus.

Quibusdam, praesertim minoribus, maculae semi - obliteratae, parvulae; ut priorum loco saepe vix litura supersit. Interdum desunt omnes maculae, superstite litura postica, ut in M. necydalea; quam *Varietatem* LINNAEVS et DEGEER descripsisse videntur. Denique in

Dauuria extrema minutum legi specimen, elytris plane immaculatis. Perfectissimam faciem exprimit Tabulae nostrae Fig. 18.

E 19. *MELOE NECYDALEA*;

Tab. E. Fig. 19.

Alata, filicornis atra, elytris subacuminatis rubris, puncto versus apicem nigro.

*Meloë necydalea* PALL. *itin. II. append.* p. 720. n. 49. GOETZE *entom. I.* p. 704. n. 13.

Ad Irtin fluvium aliquoties observata Majo; sed sporadica.

## DESCRIPTIO.

*Magnitudo* et *forma* fere praecedentis, sed caput et thorax angustiora, cum corpore atra. *Antennae* filiformes nigrae. *Pedes* testacei vel subrubri. *Elytra* intense rubra, vel subtestacea, abdomine paulo breviora, apice dehiscenti - acuta. *Litura* fusca postica, non omnibus.

E 20. *MELOE TRIVITTIS*;

Tab. E. Fig. 20.

Alata coerulescenti - atra pubescens; elytris pallidis, fasciis simul tribus longitudinalibus, virente - atris.

*Meloë trifascis* PALL. *itin. II. append.* p. 721. n. 52. GOETZE *entom. I.* p. 702. n. 4.

In maxime australibus ad Iaicum rarius occurrit.

## DESCRIPTIO.

*Magnitudo* fere M. Clematidis. *Caput* et *thorax* angustiora, convexa, et *antennae* extrorsum crassiores, fere subclavatae, ut in M. Cerocoma foemina; quo maxime differt. *Color* sericeo - ater, cum nitore virescenti - chalybato, canescente lanugine obductus. *Elytra* gryseo - pallida, fasciis simul tribus longitudinalibus, viridi - sericeo nigris; quarum

communis *futuralis*, extremo subcapitata, apicem elytrorum non adtingit; laterales per elytrorum medium obsoletissime flexuosa, apicem pariter non adtingunt, mediae interdum connexae. — Distinctas fascias *Fig. 20.* nostra expressimus.

E 21. *MELOE BIVITTIS*;*Tab. E. Fig. 21.*

Alata filicornis aeneo - atra, elytris luteis, fascia longitudinali obliquata, violaceo - atra.

Ad Montes altaicos in australioribus occurrit rarius.

## DESCRIPTIO.

*Magnitudo et forma* fere M. Clematidis. Caput, thorax, corpus coerulescenti - nitida, atra, tenuissima superinducta lanugine canescente. *Pedes* extremo picei. *Elytra* gryfeo - lutea, singula fascia longitudinali violaceo - atra, postice emarginata, apicem non adtingente, antrorsum versus axillas obliquata, acuta. Vide *Fig. 21.*

E 22. *MELOE MAVRA*;*Tab. F. Fig. E. 22.*

Alata, filicornis, atra glabra, elytris gryfeo - flavis immaculatis.

*Meloë algiricus LINN. Syst. XII. p. 681. sp. II.*

*Mylabris immaculata FABRIC. entom. append. p. 826.*

Mihi inter Insecta capensia bis transmissa fuit per amicos in Belgio; videtur itaque per Africam universam extensa esse species.

## DESCRIPTIO.

*Magnitudo* Mel. vesicatoriae, sed magis cylindracea. *Corpus* glabrum, atrum. *Caput* vix discretum a thorace, suborbiculari convexo. *Antennae* extrorsum paulo crassiores, praesertim articulo terminali ob-

M 3

longo - acuto. *Pedes* tarfis folito longioribus. *Elytra* convexa, apice subdehiscentia, gryeo - flava, immaculata. Vid. Fig. 22.

### E 23. *MELOE* BIVVLNERA;

*Tab. E. Fig. 23.*

Alata, sericeo - coerulescente atra, elytris macula postice futurali fulvo - lutea.

Attelabus bimaculatus PALL. *itin. I. append.* p. 466. n. 45. GOETZE en. tom. I. p. 423. n. 3.

Cantharis parva viridis, elytris ad apicem maculis 2. flavis rhombis LEPECHIN. it. I tab. 16. f. II. p. 509. GOETZE ent. I. p. 542. n. 2.

Minuta ad Volgam copiosa, paulo major ad Irtin; at magnitudinem *Mel. atratae* aequans, imo superans, ad Ieniseam occurrit. Viget Iunio, simul cum *Mel. variabili*, *florali*, pluribusque affinibus. Ad Irtin in Astragalo austriaco, simul cum *Mel. albivitti* abundat.

### DESCRIPTIO.

*Magnitudo* summa, quam *Fig. nostra 23.* exprimit; sed superat vulgo, numerus minorum, immo occidentales vix Dermestem violaceum aequant. *Tota* tenerime pubescens et ex atro - cyanea, vel obscure viridi sericea. *Elytra* ejusdem coloris, singula macula oblongo - ovali, fulvo - lutea, postice ad ipsam futuram. *Antennae* subclavatae.

### E 24. *MELOE* CAVCASICA;

*Tab. E. Fig. 24.*

Alata filicornis, atra; thorace tereti, elytris fulvis tripectatis.

In arboreis circa Caucasum observata rarius.

### DESCRIPTIO.

Omnibus congeneribus gracilior et magis cylindracea; Attelabo formicario vix major. *Caput, thorax* suburceolato - cylindraceus, et

*corpus* aterrima, polite glabra. *Antennae* longitudine elytrorum vel longiores, setaceae. *Pedes* longiusculi, tenues. *Elytra* convexa, fulvo-lutea, singula punctis duobus versus basin minoribus, majorique pone medium. — Inspiciatur Fig. 24.

E 25. *MELOE CLEMATIDIS*;

Tab. E. Fig. 25.

Alata filicornis, aeneo - atra, pubescens; elytris gryseo-lutescentibus immaculatis.

An Meloë algiricus LINN. PALL. itin. II. append. p. 720. n. 51.

Meloë Clematidis GOETZE entom. I. p. 701. n. 3.

In campis torridis ad Irtin, supra Clematidem orientali affinem, acerrimam, Iunio pascitur, minus tamen frequens, et aliis locis nunquam visa.

## DESCRIPTIO.

Meloïdi Crambes *magnitudine* et *forma* simillima, tota tenuissime pubescens; attamen politissime chalybato - atra, subcyanea cum splendescientia. *Pectus* lanugine incanescit. *Thorax* supra inaequalis. *Elytra* gryeo - lutea, flexilissima, immaculata. *Figura* 25. exactissima est.

E 26. *MELOE CRAMBES*;

Tab. E. Fig. 26.

Alata filicornis, sericeo violacea; thorace rufo, subdidymo, pubescente.

Meloë syriacus LINN. mus. reg. p. 102. syst. XII. p. 680. sp. 4.

Meloë alatus violaceus, elytris adtenuatis, thorace rubro hispido GRONOV. zoophyl. II. n. 620.

In australioribus regionibus inter Tanaïn et Volgam, in Crambe, quae Tataria hungarica CLVSII, florente abundat initio Iunii; alibi nusquam visa. GRONOVIVS e Bohemia habuit.

## DESCRIPTIO.

Nostratisbus *magnitudo* circiter Meloidis Cerocomae; sed dantur paulo maiores, itemque minores, aliquae vix supra Cantharidem sanguineam. Insectum totum, praeter pedes nigros et elytra, tenuissime pubescit. *Caput* nigrum vix chalybatum. *Antennae* filiformes, extremo articulo vix crassiore. *Thorax* obsolete ruber, nitidus, postice subdiddimus, medio disci lacuna impressa. *Corpus* violaceo - nigrum. *Elytra* mollia, nitidiora, violaceo - sericea. *Figura* E 26. optime expressa est.

E 27. *MELOE ERYTHROCYANA*;

Tab. E. Fig. 27. a. b.

*Alata* filicornis; capite, thorace bipunctato, artibusque rubris, elytris violaceis.

PALL. itin. II. p.328. (male pro *Mel. syriaca* recensita).

In lucis et graminosis calidis ad Iaicum, Volgam et Tanaen australiorem, maximeque ad Caucasum initio Iunii occurrit, Vicias Lathyrosque rodens.

## DESCRIPTIO.

Omnium alatarum in Europa *maxima*, duplo saepe major M. vesicatoria; et maximis hujus exemplis nunquam inferior, quae minima. Fere glabra, *lanugine* pectoris paene inconspicua. *Caput* subdiddymum, antice coccineo - rubrum, sed ore, cum area oculos ambiente, posticaque facie, quae thoracem respicit, piceum. *Antennae* rubro - testaceae, filiformes, extrorsum vix crassiores. *Thoracis* clypeus convexus, coccineo - ruber, nigro - marginatus, supra punctis 2. impressis nigris. *Elytra* violaceo - sericea, interdum virescentia. *Corpus* atrum nitidum. *Pedes* longiusculi, testacei, geniculis fuscis.

Fig. 27. a. Insectum majoris staturaे a dorso, 27. b. a latere visum sicut.

E 28.

E 28. *MELOE CARAGANAE*;*Tab. E. Fig. 28.*

*Alata filicornis, aurato - viridissima, glabra, thorace suborbiculato, antennis extrorsum subcrassioribus.*

Copiosissima in arenosis ad Selengam, inque Dauuriae campestribus, virgulta Robiniae Caraganae minuta rodendo desolans, maxime sub finem Junii. Rarior occurrit ad Jeniseam.

## DESCRIPTIO.

Meloïde vesicatoria paulo major & ita similis, ut prima facie vix distinguitur; essentialibus tamen differt: *Antennae crassiores, praesertim extremitate, planeque nigrae. Caput nequaquam didymum, nitidissimum. Clypeus thoracis orbiculato subquadratus, postice marginatus. Elytra paulo rigidiora minusque polita, nervo nullo nec litura apicis. Pedes robustiores, violaceo-nigri. Pectus glabrum. Color saturatius viridis sericeus, capiti & thoraci plerumque subcaeruleus, imo violascens; interdum talis in toto corpore.* — *Mares foeminis, ut in M. vesicatoria, multo minores; at foetor omnino nullus, ne quidem contriti Infecti.* — *Figura 28. nostra majorem staturam foeminarum depingit.*

E 29. *MELOE ERYTHROCEPHALA*;*Tab. E. Fig. 29. a. b.*

*Alata filicornis, aterrima glabra, capite rubro.*

*Meloë sibirica* PALL. *itin. II. app. p. 720. n. 56. GOETZE entom. I.*  
*p. 704. n. 14.*

*Meloë pectinatus* LEPECHIN. *itin. II. p. . tab. II. fig. 26. GOETZE entom. I. p. 701.*

*Meloë algiricus* (falso) SVLZER *hiflor. p. 66. tab. 7. fig. II. foemina.*

*Meloë capite rufo* SCOPOL. *ann. hifl. nat. V. p. 103. n. 82?*

In Sibiria campestri abundat ab exitu Maji ad medium Junii, immo ad Julium usque; primum circa Ischimum frequentius visa, rarissime ad Jaicum, copiosissime omnium circa Irzin. In Dauuria major, M. ve-

N

sicatoriam maximam aequans. — Colligitur gregatim circa Astragalum austriacum, Gypsophilam paniculatam, Trigonellam ruthenam, Melilotum, immo Polygonum aviculare; a quibus exturbata celeriter humi discurrit. *Oleum e geniculis flavescentis, inodorum.*

### DESCRIPTIO.

*Magnitudo rarius Mel. vesicatoriae, sed angustior, gracilior, teretiuscula; tota atra, subopaca, glaberrima.*

*Caput a thorace valde discretum, cordatum, subdidymum rubrum; ore oculis antennisque nigris.*

*Thorax niger, stria longitudinali, postice profundius impressa, punctisque duobus impressis.*

*Elytra flexillima, atra, abdomine paulo breviora, apice rotundato dehiscentia, limbo terminali albicante.*

*Foeminis antennae filiformes (Fig. 29. b.) at in *Maribus* plerumque paulo majoribus, licet gracilioribus, articuli intermedii 3 — 7. plani, antrorsum dente produci; unde antennae medio latiores, ferratae, quod in Fig. 29. a. maris bene expressum est. Fig. 29. b. maximam foeminarum staturam imitatur.*

### NOTA.

SVLZERVVS hanc perperam cum Mel. algira LIN. confudit, videturque definitionem Linnaeanam non adtente legisse. Neque rectius FVESSLIN (*entomol. Mag. I. p. 187.*) qui SVLZERVVM corrigens Mel. afram Lin. dixit.

### E 30. *MELOE CINEREA;*

*Tab. E. Fig. 30.*

*Alata filicornis, nigra, tota tomento cano cinerea, elytrorum ora albida.*

Meloë cinereus FORSTER *centur. Inf. I. p. 62.* GOETZE *entom. I. p. 704. n. 15.*

?An *Lytta marginata* FABRIC. *entom.* p. 260. *sp. s.* (forte detritum specimen, pro capensi habitum).

Inter Insecta Noveboracensia Americes hanc speciem ex Anglia a Nobilissima Anna BLAKBVRN accepi.

### DESCRIPTIO.

*Magnitudo* praecedentis, vel etiam major; *forma* similis, sed crassior, elytris convexioribus, postice non dehiscentibus, et abdomen totum tegentibus, minusque flexilibus.

*Caput*, *thorax*, *corpus* totum et *elytra* nigra, sed strictissima superinducta hirsutie cana cinerascunt; imo ora futuraque elytrorum albida. Sed occurruunt specimina deraso pilo tota nigra, praeter oram elytrorum et futuram albicantem. *Caput* *stria* incisa longitudinali, et in quibusdam lineola rufescente.

*Pedes* majores et robustiores, quam in praecedenti, minusque cinerascentes reliquo corpore. *Tarsi* subtus grysei; *falculae* evidentius geminatae; quod tamen in Meloidibus facile omnibus. —

*Antennae* subpilosae, in altero sexu (minore, et albidiore) mediis articulis subserratae; unde affinitas quaedam cum antecedenti specie. *Figura* 30. nostra ad specimen majus, filicorne delineata est.

### OBSERVATIO.

Cum hic descripta *Mel. cinerea*, non est confundenda minor species americana, tota aterrima, glabra, subopaca; quam itidem inter Noveboracensia Insecta communicavit Nob. *Domina Anna BLAKBVRN* et titulo *Cantharidis pensylvanicae* descripsit Ill. DE GEER (*Ins. Vol. V.* p. 16. tab. 13. fig. 1.). Haec *Mel. ambustae* (*Fig. 34.*) magnitudinem vix excedit, eidemque ita, praeter colorem, similis est, ut iconem addere superfluum crediderim. Sed est tota glaberrime atra, et thorace graciliore, pedibus exiliioribus, corporeaque angustiore a *Mel. cinerea* differt. Poterit haec *Meloë atrata* cognominari, quo sub *Lyttae* genere pro eadem significanda usus est FABRICIVS *Entom.* p. 260. *sp. 4.*

E 31. *MELOE PVNCTATA;**Tab. E. Fig. 31.*

*Alata filicornis, picea, capite incanescente, thorace orbiculato elytrisque impresso - punctatis.*

In Dauria rarius observata fuit.

## DESCRIPTIO.

*Magnitudo minoris Cantharidis. Caput singulare, majuscum, postice angulatum, tomento strictissimo incanescens. Antennae filiformes. Thorax suborbicularis vix evidenter pubescens, totus ater, subtilissimis punctis impressis sparsus. Elytra flexilissima, piceo - nigra, punctis impressis tota adspersa. Pedes nigri, praeter posticos minusculi. Cum Mel. aterrima minime confundenda, et a sequentis varietate minore nigra pariter distincta.*

E 32. *MELOE TRICHRVS;**Tab. E. Fig. 32.*

*Alata filicornis, thorace corporeque tomentoso cinereis, capite rubro, elytris gryseo - pallidis immaculatis.*

Hanc quoque inter Insecta Noveboracensis Americes misit supra laudata Nobiliss. A. BLAKBVRN.

## DESCRIPTIO.

*Magnitudo Mel. erythrocephala. Caput majuscum, subglobosum rubrum; oculis majusculis ovalibus piceis; ore, palpis, antennisque fuscis.*

*Thorax exiguis, brevissimus, conicus, pilis prostratis canescens, stria dorsali laevigata nigra.*

*Elytra extremo rotundata, ut in M. erythrocephala, sed latiora, tota gryseo - pallida, tenuissimo cano pilo pruinosa.*

*Corpus totum pilo, colorem nigrum obnebulante cano, prostrato cinerascit; item femora. Tibiae gryseo-fuscae; tarsi picei. Alae subpellucidae, venis testaceis. — Caeterum vide Figuram nostram 32.*

E 33. *MELOE ALBIVITTIS;*  
Tab. E. Fig. 33.

Alata filicornis, atra; capite rubro, elytris ora fasciaque longitudinali alba.

*Meloë erythrocephalus* PALL. *itin. I.* p. 466. n. 46. GOETZE *ent. I.* p. 703. n. 10.

*Cantharis corpore atro, elytris albo-fimbriatis, cum linea alba longitudinali.* LEPECHIN. *itin. I.* p. 426. tab. 16. fig. 8. GOETZE *entom. I.* p. 542. n. 1.

In australibus ad Volgam et Jaicum minus frequens, sed pulchrior; circa Irzin et Obum fl. (cum varietate præcociore minuta) frequentissima, præsertim post medium Junii. Circa easdem fere plantas, quae M. erythrocephalæ gratae sunt, congregatur. Vix amplius occurrit ad Jeniseam, et in orientalioribus plane deest.

#### DESCRIPTIO.

*Magnitudo* infra Mel. erythrocephalam, pauloque brevior; atra, tenuissime pubescens.

*Caput* nitidulum, rubrum; ore, oculis, antennis, areaque a vertice frontem dividente nigris. *Antennæ* in altero sexu medio planiusculæ.

*Thorax* supra planiusculus, impressionibus nullis, striga longitudinali canescenti · alba.

*Elytra* opaca nigra, ora undique ambiente, et fascia, in singulo, per medium longitudinali coerulescenti · albis.

*Varietas* præcox datur, sextuplo minor, capite subbrunneo vel piceo; elytris linea obsoletiore alba, imo saepe totis nigris. Haec primo vere, jam sub finem Maji, ante majorem prodit copiofissime, præsertim in campis Ischimensibus et Barabenibus. — At *Figura* nostra 33. majorem, perfectissimo habitu, exprimit.

E 34. *MELOE AMBVSTA;**Tab. E. Fig. 34.*

Alata filicornis, atra; elytris gryseo - marginatis, linea  
saepe alba longitudinali.

In Dauuria transalpina frequentissima occurrit, circa Astragalos  
gregaria. Proxime videtur stare ad Lyttam (Meloïdem) vittatam FA-  
BRICII (*entomol. p. 260. sp. 3*) quae mihi non innotuit, et major est.

## DESCRIPTIO.

Minori praecedentis varietati simillima, fere gracilior; *pedibus*,  
praesertim posticis, longioribus; tota nigra, glabra. *Thorax cylindra-*  
*ceus* a dorso subdidymus. *Elytra nigra*, ora circumcirca gryseo lute-  
scente, apiceque latius, unde quasi torrida facies. *Antennae filiformes*.

In paucis majusculis, qualem *Figura 34* expressimus, singulum  
elytron linea longitudinalis cana percurrit, ut in praecedenti; iisdem-  
que thorax linea albida divisus.

E 35. *MELOE TENVICOLLIS;**Tab. E. Fig. 35.*

Alata filicornis, viridi sericea, thorace coarctato rubro.

Inter Insecta Orae Cis - Gangeticae Indiae benevole transmisit  
*Illust. Liber Baro à RENGERS*; Eandem ex Oriente *Amiciss. BRÜNNI-*  
*CHE*. Cum Mel. afra LIN. convenit thorace rubro, sed non colore  
corporis.

## DESCRIPTIO.

*Magnitudo* fere praecedentis, sed gracilior.

*Caput* viridi - auratum, oblongiusculum; ore coerulescente, ocu-  
lis antennisque filiformibus fuscis.

*Thorax* angustissimus, conicus, antrorsum valde attenuatus,  
postice subdidymus, coccineo - ruber, cum viridante resplendentia.

*Elytra* viridissime sericea, uti totum corpus tenuissima lanugine canescente subholosericea, apice haud dehiscentia.

*Subitus* corpus e virente magis aureum. *Femora* viridi-aurea; at *tibiae* tarsiique grysei. *Figura* 35. caeteroquin exactissima est.

### O B S E R V A T I O N E S

*in Meloïdes generatim.*

Descripti hic Meloïdum triginta novem species, quotquot scilicet in collectione propria habui, plurimasque ex his novas: quibus si adjeceris notissimas species europaeas, ut Meloidem Proscarabaeum, majalem & Cerocomam, deinde species aliquas mihi non ex autopsia cognitas, v. gr. Mel. Marci, afram & Chrysomeloidem LINNÆI, & FABRICII Lyttas vittatam & atratam (de qua supra ad E 30. dixi), ac Mylabrides fasciatam & trimaculatam; denique cel. SCOPOLI Mel. rufidorsam & cinnabaream (nisi haec forte ad aliud genus pertineat) & accuratissimi SCHRANK Mel. hungaram: habebimus quinquaginta duas ad minimum species, in genere Meloidum probe distinguendas; id est, quadruplo fere plures, quam exposuit LINNAEVS, (cujus tres ultimae species ad Attelabos & Cantharides sunt referendae,) & quam FABRICIUS quatuor generibus comprehendit.

Mihi quidem hoc genus, cuius fine dubio perplures adhuc in Africa, Oriente & America latent species, eo magis adtentione & illustratione dignum visum est, quo magis medica virtute ad humani generis utilitatem conferre jam insoluit & in posterum promittit. Sic enim Meloïdis vesicatoriae efficacia quotidiano usu confirmata est; eundemque usum vesicatorium praestiterunt antiquis Medicis species flavofasciatae variae \*), & apud Nomadas, praesertim Calmuccos hodienum

\*) DIOSCORIDES Lib. II. cap. 54. sic habet: „E frumentis congestae Cantharides: „—potentissimae omnes variae, luteis li- „neis, quas in pennis transversas habent, „promisloque corpore, crassae, ac blati- „tarum modo perpingues; sed inertes ac „imbecillae, quae unius coloris.“ Et se-“quenti capite 55.: „Simili modo recon-“duntur Buprestes, genera quaedam Can-“tharidum et pinorum eruca (πιτυοκαμπα):“ quae supra cribrum suspensum ferventi-“cinere paulisper intortae, reponuntur.

„Vis omnium communis: erodere, ulce-“rare, calorem elicere: qua de causa ad-“miscentur medicamentis, quae lepras, „ferosque lichenas & carcinomata sanant. „Menses ciunt pessis emollientibus addi-“tare. Aliqui cantharides antidotis impo-“sitae, aquae subter cutem auxiliari pro-“diderunt; argumento quod urinam mo-“veant. Alii pennas pedesque, contra „potarum veneficia, remedio esse tradi-“derunt.“

praestant, qui eas leprosis quoque morbis topice applicant, et excitata vesica cutem renovare satagunt. Eundem in scopum a veterinariis adhibentur mitiores, sed tamen vesicantes Proscarabaei; quorum resuscitata nuper virtus interna contra rabiem celebritatem etiam majorem acquirere posse videtur. Ne dicam usum diureticum & aphrodisiacum, quem forte quaedam species, si experimentis tentatae fuissent, mitiorem & tutiorem praestarent, quam hodierno tempore officinalis; ne dicam denique egregium tinturae cantharidum usum antiparalyticum externum, qui alias virtutes in hoc genere adhuc latere spem movet, tanto facilius explorandas, quum species, pleraeque gregales, facile sufficienti quantitate colligi possint. Mihi ad hujusmodi experimenta cum sibiricis nostris speciebus instituenda otium et occasio defuit; sed alios observatores, praesertim inter medicos, aliquando invenient.

Interim Meloïdes minus propter auri particulam, nuper, si facto fides, a Rudolpho FORSTEN \*) in Cantharidum officinalium capite mortuo repartam, quam ob jam notas istas virtutes medicas memorabiles, notemus & propter noxam, qua in calidis regionibus apud pastorales populos infames sunt. Tatari saltem & Calmucci a degutitis inter herbas Meloïdibus armenta interimi & tumore fere disrumpi perhibent, easque nominibus indicant propriis (*Allaguluk* Tatar. *Zooborchorchoi* Calmucci) \*\*). Horumque Nomadum fide solae fere Meloïdes variegatae (v. gr. *M. variabilis*, *crocata*, *calida*) pro antiquorum *Buprestide* declarandae viderentur; nisi eadem cuius in *Cimicis* quoque olitorii varie maculatas varietates caderet, qui vere primo in australibus desertis gregatim insident plantis praesertim tetradynamis, quas armenta post hibernum jejunium avide vorant, & saepe, cum acerrimo sale deleteriis cimicibus istis, in propriam perniciem deglutiunt.

\*) Dissertatio med. inaug. Cantharidum historiam naturalem & medicam exhibens, auctore Rudolpho FORSTEN, *Lugd. Batav.* 1775. 4. pag. 25.


\*\*) *Allaguluk* Kirgisiorum ex eorundem relatione est insectum parvum, rubro-varium, quod Artemisiae austriacae (J A C Q.) aliisque ab ovibus adamatis turmatim inhaberet, et foetore suo, ubi sic acervatum occurrit in plantis, facile se prodit. Aliqui, forte haud fide digni, asseruerunt morfu esse lethale, devoratum emesin causare.

— In Anglia creduntur oves a deglutito Proscarabaeo turgescere et occidi; saltem hunc indigitare videtur *Gnil. ELLIS*, ubi de morbis oyium agit. Idem vero alio

loco de Lampyridibus comestis & de insectis rubris, ricino suillo similibus, (forte cimicibus) eadem accidere monet *Buprestis* antiquorum. quam Bubus etiam lethalem fuisse, ex *AELIANI de nat. anim.* lib. 6. cap. 35. alisque antiquorum locis, sat constat, in Orientis tantum regionibus celebris & inquinata fuisse videtur. In Italia certe non dari & inde constat, quod Geponici Romani de eo minus diserte scripsierunt & post *ALDRONAVDVM* asserit *VALLISNERIVS* (*Operum Vol. III. p. 379.*) qui recte autumat sale cantharidum simili potissimum nocivum esse *Bupresten*, vel ut alii vocarunt *Bublisten*, *Bubeftin*, *Bustafarin* aut *Vulpestrin*.

SCARABAEI.

Tab. A.




D. R. Nigrobius Ed.

R. Nigrobius sc.



SCARABAEI, CURCVLIONES. Tab. B.



D.R. Nöckmann Del.

J.G. Sturm Sc.



TENEBRIONES.

Tab. C.




D. R. Nitschman del.

I. G. Sturm Jr. Norim.



BUPRESTES.

Tab. D.




D. R. Nitshmann del.

I. G. Sturm sc.



## MELODIES.

Tab. E.




D. Ren. Nitschman del.

*Io[n] Nuschiegel sc. Norimberga.*




CERAMBYES cet.

Tab. F.



D.R. Mischmann del.








CVRCVLIONES. MELOIDES. cet.

Tab. H.



D.Ren. Nitidman del.

I.C.Bock sculp. Norib.



FONDAZIONE  
MUSEI SOLOMON R. Guggenheim  
BIBLIOTHEKA

<http://rcin.org.pl>







St. Inst. Zool. PAN  
Biblioteka  
**K.5255**